

CAÇA CHE DIRUN SAN PA^BLO MENA^N, DECHUH YE YAHN IHYAN YAHN DENDIOHS CHE VATE YE YA^N CORINTO

1 ¹U Pa^blo, che tendahnun Dendiohs u che co apóstol yahn Dihvo vo Jesucristo, nduco dihno vo Sóstenes, ²dirun nuhn caça cuh, dechuh nuhn yahn nchuhn, ihyan yahn Dendiohs che ritahno ne Dihvo vo Jesucristo, vate ne yaⁿ Corinto. A tendahnun Dendiohs nchuhn che co ne ihyan ndah yahn ye, ritahno ne Dihvo vo Jesucristo. Numachahte iyehense ne, a tendahnun ye uvo maⁿ, nducoyaça dihno vo maⁿ, che rendeva vo nduco ye yavenaⁿ Dihvo vo Jesucristo. ³Chida vo Dendiohs maⁿ, Dihvo vo Jesucristo maⁿ, din yahino ye nchuhn, din ye che nda^hca^ça cuahtenan ne.

*Yahino Dendiohs ihyan yahn ye che
cuande yahn Dihvo vo Jesucristo*

⁴Cuahn da^ma reneca^h nundihve cuahn Dendiohs ca^va nchuhn yahn che yahino ye nchuhn che cuande yahn Dihvo vo Jesucristo. ⁵Yahino ye nchuhn, ne te ndahva ye vederihquentiyon che cuahndudo ne ndudo yahn ye maⁿ, vededevano che chenana cuma ne maⁿ. ⁶Tihca^ç chinahn nduco ne, te a chitahno ne ndudo ndah yahn Dihvo vo Jesucristo. ⁷Nchuhn nduco nducoyaça ihyan yahn Dendiohs, quendihconahn te ye vederihquentiyon yahn ye nchuhn. A

chenan rino ne ro che ndaconan nda tun Dihvo vo Jesucristo. ⁸Dendiohs ne, din ye che cochahtino ne, quendi ne cotahno ne Dihvo vo Jesucristo, hua cuahtendihco ne nunde nde ro che ndaconan nda tun ye. ⁹Dendiohs ne, redinahñ ye ndudo yahn ye, ne man ye tendahnun ye nchuhn cava che cotahno ne Daya ye Jesucristo, ihyan min che Dihvo vo.

Ihyan che rendo dama ye yaco ne, o ino cuan ndi ye

¹⁰Dihnó, nducote renevahñecun nchuhn Dihvo vo Jesucristo ne, rahn rí nchuhn che ndo yan ne nduco vih, ama cuan co no ne man, ama no vederendedecadino cuahtenan cuma ne man. ¹¹Dihnó, nahn che tihca din nchuhn, te rahn ihyan ndevaco cahvo vo Cloé ri ye u che vate canda ne nduco vih yahn che a vih rahn ama, a vih rahn tama ne. ¹²Nahn ne ne, rahn ne che riquendi ne ndudo che ricuahn Pablo, nahn ne ne, che ricuahn Apolos, nahn ne ne, che ricuahn Pedro, nahn ne ne, che chicuahn Dihvo vo Jesucristo. ¹³Ama vedetundo che tihca redin ne. Dihvo vo Jesucristo ne, ama no ye. Ndiyu Pablo che quenan yah ye nan cruz cava che ndedevahn ye nchuhn. Ndiyu Pablo cah nchuhn cuahn che chedenune ne. ¹⁴Nundihve cuahn Dendiohs che neve ra nchuhn, chehdenuné nchuhn. Atenan Crispo man, Gayo man, chehdenuné sahn. ¹⁵Nde hua co cahma ne che u cah ne cuahn che chedenune ne. ¹⁶Namin chehdenuné ihyan ndevaco Estéfanos. Co atenan ihyan chahn no che chehdenuné, ¹⁷te dechuh Dihvo vo Jesucristo u, ndiyu che cuehdenuné ihyan, ate che cuahndudó ndudo ndah yahn ye. Rahndudó ndudo min numa cuaco. Hua retihdenan vededevano yahn man, cava che tihca ne, codevano ndah ihyan nduhca che chih Dihvo vo Jesucristo, quenan yah ye nan cruz.

Ndudo yahn Dihvo vo Jesucristo ne, chemin che vederihquentiyon yahn Dendiohs man, vededevano yahn ye man

¹⁸Ihyan che va che conda ye, din nunde yahn ye ne, rahco ye te ama vedetundo che ritahno vo che yahn che chih Dihvo vo Jesucristo, quenan yah ye nan cruz, co ndevahn vo. Ate uvo che ndedevahn Dendiohs uvo ne, a devano vo te chemin ne, ama vederihquentiyon chahte yahn ye, ¹⁹nduhca che a ndirun nan Ndudo yahn ye tuhca:

Caḥco ró che hua richihve vederendedecadino yahn ihyan, decuihnó vededevano yahn ye.

²⁰Anduhneca ndete che hua richihve ndudo yahn sahn devano man, sahn che nda cuande se dehtenduh che ri iyehñse cuh man, te Dendiohs ne, a chihco ro ye che vededevano yahn se ne, ama vedetundo. ²¹Tihca din ye, te numacuahn vededevano yahn ye chihco cade ye che ihyan iyehñse ne, hua tuno vededevano yahn man ye che cotahno ye ihyan. Tahque ndah ne, chihco cade ye che, nduco ndudo yahn man ye che rahndudo vo, ndedevahn ye ihyan yahn ye, andahre rahco ihyan chenahn te chemin ne, ama vedetundo.

²²Ihyan nación yahn Israel ne, dinoca nahn ndihchero ye vederihno cava che cotahno ye. Ihyan nación chenahn ne, atenan vededevano che dama nduco vededevano yahn man ye ritahno ye. ²³Ate uvo, ihyan yahn Dendiohs ne, rahndudo vo che, cava che ndevahn ihyan ne, va che cotahno ye ndudo yahn Dihvo vo Jesucristo, ihyan min che quenah ye nan cruz. Ihyan nación yahn Israel ne, rahcotahn ye yahn ndudo min, rahtendihco ye nunde. Ihyan nación chenahn ne, rahco ye te ndudo min ne, ama vedetundo. ²⁴Uvo che a tendahnun Dendiohs van ihyan nación yahn Israel man, van ihyan nación chenahn man ne, a devano vo che ndudo yahn Dihvo vo Jesucristo ne, a vederihquentiyon yahn Dendiohs man, vededevano yahn ye man. ²⁵Vededevano yahn Dendiohs man, vederihquentiyon yahn ye man ne, tahque chahte che co nducuahn vededevano yahn ihyan iyehñse, andahre rahco ye te ama vedetundo, nde hua richihve. ²⁶Dihnó, cuenecaḥco ne nduhchan ihyan ne ro menan. Atenan neve ne che ihyan devano ne van combiero yahn ne man, neve ne che chenah cuma ne vederihquentiyon man, neve ne che ndata yahn ihyan nahn man, ²⁷ate a tendahnun Dendiohs nchuhn. Ihyan iyehñse ne, rahco ye che tundo ne man, che hua rignon chihve ne man, ate a tendahnun Dendiohs nchuhn cava che ndahco ndiya ye vededevano yahn ihyan chahn man, vederihquentiyon yahn ye man. ²⁸Yade ihyan chahn, ne rahco ye che ndere ihyan nchuhn, nde hua redin cuande ye nchuhn. Ate a tendahnun Dendiohs nchuhn, chihco ro ye che nde hua richihve vederendedecadino yahn ihyan chahn. ²⁹Tihca din ye cava che nde ama ihyan, hua co din yade ye. ³⁰A Dendiohs

che din ye che ritahno vo Dihvo vo Jesucristo. A cava ihyan min che din ye che chenán cuma vo vededevano man, nchahco ye nunde yuhn vo man, nedín yahn ye uvo man, ndedevahn ye uvo man. ³¹Che nahn ne, che dinahn ihyan nduhca che a ndirun nan Ndudo yahn Dendiohs tuhca: “Hua ndahca che ndeva man ihyan yavenan ye. Tahque ndah ne, ndeva ye yavenan Dihvo vo Dendiohs.”

Ndudo yahn che quenán yah Dihvo vo Jesucristo nan cruz

2 ¹Dihnó, cuahn che ndá cahndudó ndudo yahn Dendiohs, chihnevan ne ne, hua din yadé, te cahndudó numacuahn vedenecon. ²Chihcó cudado che cahndudó deman ndudo yahn che quenán yah Dihvo vo Jesucristo nan cruz, ndedevahn ye uvo. ³Numacuahn ro che quenán yan vaco nchuhn ne, quechicá numacuahn vedino vedenecon. Ama vahinó man, ama ndedecadinó man, yahn ntiyon cahnda che quenán. ⁴Numacuahn vederihquentiyon yahn Vaco Ndah yahn Dendiohs, nté man, cahndudó man, van nchuhn. Nde tah hua chihchetahn vededevano yahn man, ⁵cava che a vederihquentiyon yahn Dendiohs din che cotahno ne, ndiyu vededevano yahn man.

Redin Vaco Ndah yahn Dendiohs che renahn vo vederihquentiyon yahn ye

⁶Nuhn che rahndudo nuhn Ndudo yahn Dendiohs van nchuhn che a renahn ndah ne man, van ihyan chenahn man ne, hua rahndudo nuhn vededevano yahn man nuhn, te rahndudo nuhn deman vededevano yahn Dendiohs. Vededevano min ne, yahn Dendiohs, ndiyu yahn ihyan iyehense. Ndiyu yahn sahn devano man, sahn ndinan man, che vate se man ro cuh. Sahn chahn ne, va che cuhno se. ⁷Tahque ndah ne, rahndudo nuhn vededevano yahn Dendiohs che cade te ye, checadino vo, che nde hua devano ihyan ro menan. Nde cuahn che ametah dendah ye iyehense ne, chihco cade ye vededevano min nduhca che ndedevahn ye uvo, cuahtenan vo vahchetero numacuahn ro. ⁸Nde ama sahn che rihquentiyon se iyehense cuh ne, hua tumacadino se yahn vededevano min. Chemin che nahn yah se Dihvo vo Jesucristo, ihyan min che ama yudo vederihquentiyon quenán cuma ye. Ndete che tumacadino se ne, hua tihca din

se. ⁹Andahre tihçā din sahn chahn, ate a chinahn nduhçā che ndirun nan Ndudo yahn Dendiohs tuhçā:

Dendiohs ne, a chihco çade ye che conan cuma ye vedeyahino nduco ihyan che yahino ye.

Ama chahte vedeyahino yahn ye, che nde hua co tumacadino ihyan nunde.

¹⁰Ate uvo, ihyan yahn ye ne, din ye che quenun Vaco Ndah yahn ye uvo, tumacadino vo yahn vedeyahino yahn ye. Vaco Ndah yahn Dendiohs ne, devano ndah nducuahn che ri, nde nducuahn che redin ye. ¹¹Van ihyan iyehñse ne, queri ama ye ne, atenan man ye devano ye che rendedecadino ye. Namin nde ama ihyan hua devano ye che rendedecadino Dendiohs. Atenan Vaco Ndah yahn ye devano. ¹²Nuhn che rahndudo nuhn Ndudo yahn Dendiohs ne, ndiyu vededevano yahn ihyan iyehñse che te Dendiohs, chen an cuma nuhn. Tahque ndah ne, din ye che quenun Vaco Ndah yahn ye nuhn, din che tumacadino nuhn yahn vedeyahino yahn ye çava nducoyaco vo. ¹³Ndiyü nduco vededevano che chahn nuhn yahn ihyan, che rahndudo nuhn ndudo yahn vedeyahino yahn Dendiohs. Tahque ndah ne, a Vaco Ndah yahn ye che rete vededevano nuhn che rahndudo nuhn. Tihçā rinan Vaco ye nuhn che rahndudo nuhn ndudo che nahn che cadino ihyan.

¹⁴Ihyan iyehñse ne, hua renevahñecun ye vederihquentiyon yahn Vaco Ndah yahn Dendiohs, te rahco ye te chemin ne, ama vedetundo. Nde hua retumacadino ye yahn, te atenan ihyan che quenun Vaco Ndah yahn Dendiohs ihyan co tumacadino ye. ¹⁵Ihyan che quenun Vaco Ndah yahn Dendiohs ihyan ne, retumacadino ye yahn nducuahn dehtenduh, ne nde ama ihyan hua ndahçā che ndahchenan ye ihyan. ¹⁶A ndirun nan Ndudo yahn Dendiohs tuhçā: “Ametah nde ama ihyan iyehñse che co tumacadino ye yahn vederendedecadino yahn Dihvo vo Dendiohs. Ametah nde ama ye che tuno vededevano yahn ye che cacuahn ye ihyan.” Ate uvo che nedin yahn Dendiohs uvo ne, ama no vederendedecadino yuhn vo nduco Dihvo vo Jesucristo.

Ihyan che redin ye ntiyon yahn Dendiohs

3

¹Dihñó, cuahn che quenán nduco nchuhn ne, anduhñeçā ihyan che hua conun Vaco Ndah yahn Dendiohs ihyan

man, anduhneca ihyan nunde man, anduhneca checahya che queman rico man, tihchan ne, te metah conahn ndah ne ndudo yahn Dihvo vo Jesucristo. Chemin che hua chi chicuahn nchuhn nduhca che redin yahn che cacuahn ihyan che renahn ndah ye. ²Nduhca che redin ihyan nduco decuah yuno, ricuh ye deman leche yahn che hua ri che cahcaceh ye dehtenduh, tihca din nduco nchuhn ro min, te metah tumacadino ndah ne, ne hua chi chicuahn ndah nchuhn. A devano te nde meniyon ne, ametah tumacadino ndah ne, ³te dama ri ne nduco ihyan nunde. Redin ve ne yahn vih man, vate canda ne nduco vih man, o ino cuan ndi ne man. Che tihca redin ne ne, rihco ro ne che dama vederendedecadino yahn ne nduco ihyan nunde. ⁴A ndero ndi che o ino cuan ndi ne, te nahne ne ne, rahn ne che riquendi ne che ricuahn Pablo, nahne ne ne, rahn ne che riquendi ne che ricuahn Apolos. Vatechica ne nduhca ihyan nunde.

⁵U nduco Apolos, atenan ntiyon yahn Dihvo vo Dendiohs redin nuhn. Nda nuhn yan vaco nchuhn, cahndudo nuhn ndudo yahn Dihvo vo Jesucristo, chitahno ne. Queri ama nuhn ne, redin nuhn nduhneva ntiyon che chihco ye tah nuhn. ⁶Nuhn ne, ihyan redin ntiyon yahn ye nuhn. U, ne anduhneca ndete che tuhdó ndute ndata, te u menan ndita cahndudó ndudo ndah yahn Dihvo vo Jesucristo, chihnevan ne, ne Apolos ne, anduhneca ndete che chi se nune van chendata, te quendi ye chicuahn ye nchuhn. Ate a Dendiohs che din ye che chitahno ne. ⁷Ntiyon yahn nuhn ne, nduhca ntiyon che redin ihyan viyata. Nahne cuan ne, riquendah yahn ama ihyan che retuhdo ye ndute ndata, ne riquendah yahn tama ye che ri ye nune van. Ate a Dendiohs che redin ye che rihta. Nducote tihca ne, tumacadino vo che anduhneca ndete che hua rignonun chihve ntiyon yahn ama tama ye, che retuhdo ye ndute ndata man, che ri ye nune van man, te atenan Dendiohs che redin ye che rihta. ⁸Ihyan che retuhdo ye ndute ndata man, ihyan che ri ye nune van man, ama cuan ndi no ntiyon yahn ye nduco vih. Tihca ntiyon che redin nuhn nduco vih. Ate a devano vo te Dendiohs ne, ndahco menun ye yahn queri ama vo tunoca ntiyon che a nedin vo. ⁹Nuhn ne, dama redin nuhn ntiyon yahn Dendiohs nduco vih, ne nchuhn ne, anduhneca ndete che chendata yahn ye.

Atihnoçá co çahma vo che nchuhn ne, anduhnecá ndete che ama vah che rihno Dendiohs. ¹⁰Numacuahn vedeyahino yahn ye ne, ndahco ye ntiyon táh che có anduhnecá sahn vihcherahto ndah che chihcó name yahn ama vah, ne tama ye ne, riquendi ye rahto ye. Ate nahn che queri ama ye ne, çahco ye cudado nduhça che rahto ye. ¹¹Name min ne, anduhnecá ndudo yahn Dihvo vo Jesucristo che nde ama ihyan, hua co ndahcorun ye. ¹²Ate anduhnecá ndete che ama ndeh nan che co cuahto nduco ye. Anduhnecá ndete che co cuahto ye nduco dehtenduh che cocha nduhça diyahnguan man, diyahngua man, tu diyah man. Namin anduhnecá ndete che co dendah ye nduco dehtenduh che hua cocha nduhça irahno man, nduco man, yata cuma man. ¹³Ate ntiyon yahn queri ama ye ne, va che co ro ndete che quendah ndah, te nda ro che techecade Dendiohs ne, anduhnecá ndete che ndihchenan ye nduco ruchiyahn. ¹⁴Duh ihyan che quendah ndah ntiyon yahn ye, anduhnecá ndete che ndahto ye nduco dehtenduh che hua cuco ne, ihyan min ne, ndahco menun Dendiohs yahn ye. ¹⁵Duh ihyan che hua quendah ndah ntiyon yahn ye ne, andahre ndevahn man ye, anduhnecá ama ihyan che ndevahn ye van ruchiyahn ne, ate va che conda ntiyon che nedin ye.

¹⁶A devano ne te nchuhn ne, anduhnecá ndete che ama yaco yahn Dendiohs nan che quenun Vaco Ndah yahn ye. ¹⁷Duh ihyan che detoh ye ino ihyan yahn Dendiohs ne, din Dendiohs castigo ihyan, te ihyan yahn ye ne, a ndihco vih ye çava ye.

¹⁸Nde ama nchuhn ne, hua cahnceh man ne nchuhn. Duh nchuhn che ama quenan cuma ne vededevano yahn ihyan iyehse che rahco ne ne, cuihcoman ne vededevano min, cuiquendi ne vededevano yahn Dendiohs, ¹⁹te vededevano yahn ihyan iyehse ne, ama vedetundo nan Dendiohs nduhça che ndirun nan Ndudo yahn ye tuhça: “Rahneçun Dendiohs che rinda ihyan, redin vederendedecadino yahn man ye.”

²⁰Namin a ndirun: “Nan Dihvo vo Dendiohs ne, nde hua richihve vederendedecadino yahn ihyan devano.” ²¹Chemin che hua din yade nchuhn, tendahnun ne che ricuahn queri ama nuhn, quendi ne, te nducuahn vederihquentiyon yahn Dendiohs ne, a chihnde çava che ndah yahn ne. ²²A Dendiohs che dechuh ye Pablo man, Apolos man, Pedro man. A ihyan min che dendah ye iyehse man, rete ye vedevihche yahn

nchuhn m̄an, rihquentiyon ye vederih m̄an, ro cuh m̄an, ro che cochi m̄an. Nducuah̄n ne, a çava che ndah yahn ne che chihco çade ye. ²³Av̄ane ne, a yahn Dihvo vo Jesucristo nchuhn, ne ihyan min ne, a Daya Dendiohs ihyan.

Ntiyon che chen̄an cuma ihyan apóstol

4 ¹Hua din yāde nchuhn çava nde ama nuhn. Cuedevano ne te queri ama nuhn ne, a ntiyon yahn Dihvo vo Jesucristo redin nuhn, rahndudo nuhn ndudo yahn vederihquentiyon yahn Dendiohs che cade te ye, checadino vo. ²Nducote tihça ne, nahn che queri ama ihyan che va tāh ye ntiyon yahn Dendiohs ne, dinahn ye ntiyon min numa cūaco. ³Che lādo yāhn ne, nde hua retumac̄ah, a nchuhn, o intiyahn, deh rāhn ne yāhn nduhça che redín ntiyon yahn ye. Nde m̄an, hua co çahm̄a ndete che ndahça, o hua ndahça redín, ⁴te andahre dave yaven̄an ne, ate nde m̄an hua devanó ndete che ndah redin̄ahn. Aten̄an Dihvo vo Jesucristo, ihyan min che nda cuande ye ntiyon che redín. ⁵Chemin che conan rino nchuhn, hua ndahchenan ne tāchan redin ihyan ntiyon yahn Dendiohs nde nda ro yahn. Nda ro min ne, a Dihvo vo Jesucristo techecāde ye yahn queri ama vo tunoca vederendedecadino yuhn vo cuahn che chahtenan vo iyeh̄nse, çahco ro ye ndete che numa cūaco nedin vo ntiyon che chihnde tāh vo. Tuhme ndahco menun Dendiohs yuhn vo tunoca ntiyon che nedin vo.

⁶Dihnó, a çava che ndah yahn ne che tihça riyah̄vé nchuhn. Andahre ndudo che ricuah̄n ihyan chen̄ahn che redin che o ino cūan ndi nchuhn nduco vih, ate a dirún yahn ne anduh̄necā ndete che u nduco Apolos chendihco nuhn nunde nān ndudo yahn nuhn. Tihça dirún yahn ne çava che tumacadino ne che vederihquentiyon che chen̄an cuma nuhn ne, hua tahque chahte che co che a ndirun yahn nān Ndudo yahn Dendiohs. Namin çava che hua din yāde ne çava ntiyon yahn ama, ndahchenan ne ntiyon yahn tāma. ⁷Nde ama ihyan hua rendihche ye nchuhn che tahque ndah ihyan ne che co ihyan chen̄ahn. A Dendiohs che te ye nducuah̄n che va yahn ne. Nducote a ihyan min che te ye ne, hua redin yahn che din yāde ne nduhça ndete che nān vedevano yahn m̄an ne rendāca ne dehtenduh che va yahn ne.

⁸A ama chenan cuma ne vederihquentiyon yahn Dendiohs, che rahco ne, a va tah ne ndendi ndendita, che rahco ne. Chacondah vedame ne nuhn, ne vate ne, rihquentiyon ne, che rahco ne. ¡Ama ndahca ndete che cuaco niyon che rihquentiyon ne!, cava che nde nuhn ne, ndo dama nuhn nduco ne, chcantiyon vo nduco vih. ⁹Ama ndahca ndete che cuaco, te nuhn ihyan apostol ne, hua tihca vate nuhn. Tahque ndah ne, cane rahco che rahnecon Dendiohs che rechuhrihn nuhn nduhca ihyan che nde hua rigonun chihve ye man, nduhca ihyan che ndindah caca nunde yahn ye cava che coh ye man. Cane rahco che ndihco mendahn Dendiohs nuhn nan nducoyaca ihyan iyehense man, nan angel man, cava che chahn ino ye ndihchero ye nuhn. ¹⁰Ihyan nunde ne, rendihchero ye nuhn nduhca ihyan tundo che rahndudo nuhn ndudo yahn Dihvo vo Jesucristo. Me nchuhn ne, ama devano ne ndudo yahn Dihvo vo Jesucristo, che rahco ne. Nuhn ne, ndi nuhn nduhca ihyan che nde hua rigonun chihve ye. Me nchuhn ne, ama ndinan ne, che rahco ne. Nuhn ne, nde hua retumacah ihyan nuhn. Me nchuhn ne, ama rendeva ihyan yavenan ne. ¹¹Nde meniyon ne, ama redin tan ihyan nduco nuhn. Ama rechuhrihn nuhn, rih cuico nuhn man, rih yaca nuhn man, metah tino yahn nuhn man, metah vaco nuhn man. ¹²A ndi cuno nuhn che redin man nuhn tama nan ntiyon cava che rendaca che rechuhnun nuhn. Rahva ihyan nduco nuhn, ate numacuahn vedenecun rendahconan nuhn yahn ye. Chenan nan ye nuhn, redin tan ye nduco nuhn, ate hua rihcoman nuhn ntiyon che chenan cuma nuhn. ¹³Rendahchenan ye nuhn, ate riyahve nuhn ihyan nduco ndah. Cuahn dama rendihche ye nuhn nduhca dehtenduh che tahque chihnga.

¹⁴Tihca dirun yahn nchuhn, ndiyu cava che cahtera vedecuihno yahn ne, ate cava che riyahve nchuhn nduhca daya che yahino. ¹⁵Tihca dirun, te andahre ndiche mil ihyan che ricuahn ye nchuhn ndudo yahn Dihvo vo Jesucristo, ate hua yahino ye nchuhn nduhca che yahino nchuhn. U ne, anduhneca indihte yahn ne, te a u che tihyon yuné nchuhn che chitahno ne Dihvo vo Jesucristo. ¹⁶Chemin che, numacuahn chedave yahn, riyahve nchuhn che quendi ne yune yahn.

¹⁷Cava che co dinahn nchuhn ne, dechuh Timoteo che conan se nchuhn. Ama yahino sahn. Anduhneca daya man,

te u tihyon yuné sahn che chitahno se Dihvo vo Jesucristo. Nde meniyon riquendi se, ndah redin se ntiyon yahn ye. Sahn min ne, nduhca che recah cuande man dihno vo nduh cañ yaco nan che quechicá, tihca te cuande se nchuhn cava che necahco ne nduhca che ritahnó Dihvo vo Jesucristo, redinahn ndudo yahn ye. ¹⁸Ama o nchuhn ne, ama redin yade ne, rahco ne che ametah ndaconan chí quendihcheró nchuhn. ¹⁹Ate ndete che nahn Dihvo vo Jesucristo ne, chi nún quendihcheró nchuhn. Tuhme ndihcheró ndete che cuaco che rahñ ihyan yade chahn che vatechica ye numa cuaco, chenan cuma ye vederihquentiyon yahn Dihvo vo Jesucristo. ²⁰Tihca nahn che dín, te ndiyu ndudo che rahñ ihyan rihco ro che rihquentiyon Dendiohs ihyan, te nan ntiyon che redin ye ne, min ndero ndí ndete che cuaco che chenan cuma ye vederihquentiyon. ²¹Man ne, cuetendahnun nchuhn cha che ri yeno ne. ¿A nahn ne che chí numacuahn vedeyahino man, vedenecon man, conán nchuhn? ¿O nahn ne che chí numacuahn vedetan, dín castigo nchuhn?

Tehecade Pablo ama nunde chihnga

5 ¹Numachahte va ndudo che ama se van nchuhn ne, quenán se nduco checuma se. Nunde min ne, ama chihnga. Nde van ihyan che hua devano ye che va Dendiohs ne, hua tihca redin ye. ²Ate nde nduco nduh ne, ama redin yade nchuhn. Tahque ndah ne ne, cuahte ran ne. Sahn chemin ca me ne, ametah cuahnecon nchuhn che conduco ca se van ne. ³Andahre hua quenán nduco nchuhn tan ne, yah ri chedave yahn cava ne. A tehecadé yahn se anduhneca ndete che quenún van nchuhn. ⁴Ro che ndo dama nchuhn, ndeva ne yavenan Dihvo vo Jesucristo ne, anduhneca ndete che nducó nchuhn. Ro min ne, numacuahn vederihquentiyon yahn ye ne, ⁵condahco ne sahn tah chundah cava che co se castigo, andahre ndevahn se ro che nda Dihvo vo.

⁶Hua ndahca che rahnecon ne che rinduco ca se van ne. A devano ne te nduco tah sihn ya ne, ri ya numacuahn yache. Tihca redin nunde yahn sahn min, te redetohnan vederihquentiyon che chenan cuma nducoyaca ne. ⁷Nduhca che rihtera ihyan ya ndico, redendah ye pan che hua nduco ya yahn ne, tihca cuihcoman nchuhn nunde che chenan cuma ne

ro menan, cuihco ro ne che a ndi vih ne cava Dendiohs. Tihca din ne, te nduhca ama itecuche lihn che chih te, chi te vedino ro yudo ne, tihca chih Dihvo vo Jesucristo, ndedevahn ye uvo. ⁸Nduhca che rihcoman ihyan pan che ndindah nduco ya yahn ne, tihca nahn che cahcoman vo nducuahn nunde yuhn vo, ne runecade cuahtechico vo man, runecade ndedecadino vo man, nduhca che nahn Dendiohs. ⁹Nan caça che dechuh yahn ne menan ne, a dirun che hua conduco ne ihyan nunde che rahtenan ye nduco ihyan che hua nihnevaco nduco ye. ¹⁰Ate hua dirun che ama yune no cahcoman ne nducoyaca ihyan chahn man, combiero yahn ye che idihya ye man, che reduco ye man, che rendeva ye yavenan dehtenduh che ndere redin ye dendiohs yahn ye man, te cava che metah ndihchero ne ihyan chahn ne, atenan che ndaca ne iyehnse cuh. ¹¹Che tihca dirun ne, che hua conduco ne dihno vo ndete che rahtenan ye nduco ihyan che hua nihnevaco nduco ye man, ndete che idihya ye man, ndete che rendeva ye yavenan dehtenduh che ndere redin ye dendiohs yahn ye man, ndete che rahva ye man, ndete che ricoh ye man, ndete che reduco ye man. Nduco dihno vo che tihchan ye ne, nde hua cheh ne dama nduco ye. ¹²⁻¹³U ne, hua cuande yahn che techecade yahn ihyan che hua ritahno ye Dihvo vo Jesucristo. A man Dendiohs techecade ye yahn ye. Me nchuhn ne, a dihno vo che rinduco ye nchuhn, va che techecade ne yahn ye. Chemin che ametah cuahnecun ne che conduco ca sahn nunde me nchuhn.

***Hua ndahca che cahn dihno vo, cuhnde cade
yahn ye nduco vih nan intiyahn yan***

6 ¹Cuahn che va canda yahn nchuhn nduco vih ne, ndotenan che cahn ne yaco, cuhnde cade yahn ne ne, rahn ne nan intiyahn yan che nde hua ritahno ye Dihvo vo Jesucristo. ¿Taca che ama tundo ne? ²Redin nchuhn anduhneca ndete che hua devano ne te nda ro yahn ne, nduco nchuhn ihyan yahn Dendiohs, techecade ne yahn ihyan nunde. Nducote tihca va cade ne, tahque nun co techecade ne canda yahn ne che nde hua vahche. ³Redin ne anduhneca ndete che hua devano ne che nde angel va che techecade ne yahn ye. Tahque nun techecade ne yahn dehtenduh che rahno ri ne man ro cuh. ⁴Tuhme ne, cuahn che va che cuhnde cade

yahn ne nduco vih ne, ndotenan che çahn ne nan intiyahn yan che nde hua ritahno ye Dihvo vo Jesucristo ne, çahn ne nan dihno vo, andahre tundo ye, ne techecade ye yahn ne. ⁵Tihça dirún yahn ne çava che co cuihnän ne. ¿Ametah nde ama ihyan van nchuhn che renahn ye mare tah, che co techecade ye yahn ne nduco vih? ⁶Rihtera ne vedecuihno yahn ne che rahn ne, rica nunde ne yahn vih nan intiyahn che nde hua ritahno ye Dihvo vo.

⁷Che rahte çanda ne nduco vih ne, nduco chemin no, ama yahn redenda ne. Tahque ndah che codin chahtino ama tama ne yahn vih, nchahco ne nunde yahn vih. ⁸Ate hua tihça redin ne, te tahque ndah ne ne, duche rino ne nde van man ne nduco vih, rahtendihco ne nunde.

⁹⁻¹⁰A devano ne te ihyan nunde ne, hua cuahtenan ye vahchetero nan che rihquentiyon Dendiohs. Cuedevano ne te ihyan che rahtenan ye nduco ihyan che hua nihnevaco nduco ye man, ihyan che redin duche yahn ye che a nihnevaco ye man, ihyan che hua numa cuaco ye, che mahñ ndahta mahñ chahn ye, che rahtenan ye van man nduco vih man, ihyan che rendeva ye yavenan dehtenduh che ndere redin ye dendiohs yahn ye man, ihyan che reduco ye man, ihyan che idihya ye man, ihyan che ricoh ye man, ihyan che rahva ye man ne, nde ama ihyan che tihchan ye ne, hua conan ye vahchetero. ¹¹Nahn nchuhn ne, tihchan ne ro menan. Ate man ne, numacuahn vederihquentiyon yahn Vaco Ndah yahn Dendiohs ne, a nchahco ye nunde yahn ne che cuande yahn Dihvo vo Jesucristo. A chedenune ne man, a nedin yahn ye nchuhn man.

Nahn che hua cuahtendihco vo nunde

¹²Va ama ndudo che tuhça: “A dehno che nahn vo ne, co din vo.” Cuaco ndudo min, ate hua redin yahn che tihça din vo. Hua ndahça che quendi vo nunde yuhn vo. ¹³Va tama ndudo che tuhça: “Dehtenduh che va ne, chihnde çava che chuh vo.” Cuaco ndudo min, ate nda ro yahn ne, ndahco cade Dendiohs nducuahñ, nde metah rendotenan che chuh vo çava che cuahtenun ico vo. Dendah Dendiohs uvo, ate ndiyu çava che cuahtenan vo nduco ihyan che hua nihnevaco nduco vo, te dendah ye uvo çava che co yahn ye uvo. ¹⁴Numacuahn

vederihquentiyon ndedetuhche Dendiohs Dihvo vo Jesucristo, ne namin tihcā ndedetuhche ye uvo.

¹⁵A devano nchuhn te queri āma vo ne, a yahn Dihvo vo Jesucristo uvo. Nducote a yahn ye uvo ne, hua ndahcā che cuahtenan vo nduco tahn che ndere vatechica te. ¹⁶A devano ne te ihyan che conan ye nduco ndahta che ndere vatechica te ne, co ye nduco te anduhnecā āma no ihyan nduhcā che a ndirun nan Ndudo yahn Dendiohs tuhca: “Ihyan che conan cuma ye āma ndahta ne, co ye nduco te anduhnecā āma no ihyan.” ¹⁷Me ihyan che ritahno ye Dihvo vo Jesucristo ne, ndo ye nduco vih anduhnecā āma no ihyan, chenán cuma ye nduco vih vederihquentiyon yahn Vaco Ndah yahn Dendiohs.

¹⁸Nducote tihcā ne, condi nchuhn cuahtenan ne nduco ndahta che ndere vatechica te. Adecoderno nunde yahn ihyan ne, rahtendihco ye. Ate che rahtenan ye nduco ihyan che hua nihnevāco nduco ye ne, rahtendihco ye nunde, nde redetoh man ye ihyan. ¹⁹A devano vo te a din Dendiohs che quenun Vaco Ndah yahn ye uvo, a ndi vih vo anduhnecā āma yāco nan che quenun. Hua rihquentiyon man vo uvo, ²⁰te a yahn Dendiohs uvo. Nde hua tuno vederendedecadino yuhn vo nduhva che yahino ye uvo, ndedevahn ye uvo cava man ye. Chemin che nahn che hua detoh man vo uvo man, ndeva vo numacuahn chedave yuhn vo yavenan ye man.

***Cah cuande Pablo nduhca che cuahtenan
cuma ihyan ndahta yahn ye***

7 ¹Man ne, ndahconán yahn ne che dirun ne yahn. Rahcō te ndahcā cava ihyan che cuahteman ye. ²Ate cava che hua cuahtendihco ye nunde, ndere cuahtechica ye nduco vih ne, tahque ndah che cahnevāco ye. ³Nchuhn che a nihnevāco ne ne, cuahtenan cuma ne vih nduhcā che redin yahn cava che hua ndaca yune che ndere cuahtechica āma tama ne. ⁴Nchuhn, ihyan ndahta ne, yahn ne inchahn ne. Nchuhn, ihyan chahn ne, yahn ne ihyan ndahta yahn ne. Chemin che nahn che dinahn āma tama ne yahn vih. ⁵Hua cuahcotahn ne yahn vih, atenan che nte cade ne che hua cuahtenan ne nduco vih āma o ro cava che covah ne. Cuihno min ne, ndo dama ne nduco vih, te adenán hua cocha āma cha ne che rahn cuhndeman ne, ne conan ne nduco tama ihyan, condihco ne nunde, dinahn ne che nahn chundah.

⁶Ráhn rí nchuhn che recáh yune Dendiohs che cahnevaco ihyan che nahn ye. Ate ihyan che cocha ye, cuahteman ye ne, co cuahteman ye. ⁷Che lado yáhn ne, ndahca che cuahteman ihyan nduhca u. Ate hua nducoyaca ye cocha ye. Dendiohs ne, hua dama vederihquentiyon necáh ye chenán cuma queri ama ihyan.

⁸Nchuhn, sahn decahya man, ndahta vah man ne, rahcó te ama ndahca ndete che cuahteman ne nduhca u. ⁹Ate ndete che hua chenán cuma ne vederihquentiyon che cocha ne cuahteman ne ne, tahque ndah che cahnevaco ne, yodemica che chuhrihn ne, ndedecadino ne che nahn cahnevaco ne.

¹⁰Me nchuhn che nihnevaco ne ne, rete cuandé nchuhn vederihquentiyon yahn Dihvo vo Jesucristo che hua tehche vih ne. ¹¹Ihyan ndahta ne, hua co tehche ye inchahn ye. Ndete che denán tehche ye inchahn ye ne, atenán che cuhdeman ye, o ndo nduco ye inchahn ye. Hua co cahnevaco ye nduco tama ca ihyan. Namin ihyan chahn ne, hua co tehche ye ndahta yahn ye.

¹²Man ne, te cuandé tama vederihquentiyon che hua ntihyon yan Dihvo vo Jesucristo. Dihno vo che nihnevaco ye nduco ndahta che hua ritahno te Dihvo vo Jesucristo ne, ndiyu cava chemin che tehche ye tahn ndete che va te vedeyeno che quendi te nduco ye. ¹³Namin cahvo vo che nihnevaco ye nduco chahn che hua ritahno se ne, ndiyu cava chemin che tehche ye sahn ndete che va se vedeyeno che quendi se nduco ye. ¹⁴Ihyan chahn che hua ritahno ye ne, redin chahtino Dendiohs yahn ye che cuande yahn ihyan ndahta yahn ye che ritahno ye. Ihyan ndahta che hua ritahno ye ne, redin chahtino Dendiohs yahn ye che cuande yahn inchahn ye che ritahno ye. Ndete che hua tihca ne, daya ihyan chahn ne, anduhneca daya ihyan che hua ritahno ye. Ate redin chahtino Dendiohs, rendihche ye daya ihyan chahn anduhneca daya ihyan che ritahno nduh che o ye. ¹⁵Ndete che ama cha ihyan che hua ritahno ye, nahn tehche ye ihyan che nihnevaco nduco ye che ritahno ye ne, a tehche no man ye vih, nde hua cahnda yahn ihyan che ritahno ye, te Dendiohs ne, hua nahn ye che cuahte canda ihyan chahn nduco vih. ¹⁶Ndete che tihca nahn ihyan che hua ritahno ye ne, hua redin yahn che cuahcotahn ihyan che ritahno ye, te nchuhn ihyan ndahta ne,

nde hua devano ne, ndete che cava ne cotahno inchahn ne, ndevahn ye. Namin nchuhn ihyan chahn ne, nde hua devano ne ndete cava ne cotahno ihyan ndahta yahn ne, ndevahn ye.

¹⁷Andahre hua cocha ndudo yahn nchuhn che cotahno ye, ate va che cuahtenan ne vedeyeno nduhca che ndihco cade Dihvo vo Dendiohs yahn ne man, nduhca che chen an ne ro che ndedevahn ye nchuhn man. Tihca rihquentiyon nduh cuan yaco. ¹⁸Nchuhn che chen an seña nchuhn ro min ne, hua dehve rahco ne, quendi ne. Me nchuhn che hua chen an seña nchuhn ro min ne, hua cuahnecon ne che conan seña nchuhn. ¹⁹A chen an, o hua chen an seña uvo ne, hua dehve din yahn chemin, te che nahn ne, che dinahn vo che rihquentiyon Dendiohs. ²⁰Atanochan uvo ro che ndedevahn ye uvo ne, cuahtenan vo vedeyeno, quendi vo tihca. ²¹Nchuhn che chen an cuma ne dihve ne, chen an ne vaco ye ro min ne, hua dehve rahco ne, quendi ne, din ne ntiyon yahn ye. Ndete che aden an te yune ye che ndaca ne ne, condaca ne. ²²Cuahn che chitahno ne Dihvo vo Jesucristo ne, nde ro min ne, a ndedevahn ye nchuhn cava man ye. Me nchuhn che rihquentiyon ne nan ntiyon yahn man ne ro che chitahno ne Dihvo vo ne, a ndo ne anduhneca ihyan redin ntiyon yahn ye. ²³Ama chahte vedeyahino quen an cuma Dendiohs cava nchuhn, ndedevahn ye nchuhn. Cava nchuhn ne, tahque rignonun chihve vederihquentiyon yahn ye che co vederihquentiyon yahn ihyan. ²⁴Dihnó, nducote tihca ne, quendi nchuhn cuahtenan ne nan Dendiohs nduhca che chen an ne ro che ndedevahn ye nchuhn.

²⁵Me nchuhn ihyan decahya ne, hua te Dihvo vo Jesucristo, checadinó nde ama vederihquentiyon cava ne. Ate u ne, numacuahn vedeyahino ndedevahn Dihvo vo u, ne redin ntiyon yahn ye numa cuaco. Chemin che rahco te cochihve che te cuandé nchuhn taca cuahtenan ne. ²⁶Che lado yahn ne, ndahca che cuahteman nchuhn, hua cahnevaco ne, te ro cuh che vato vo ne, cahnda. ²⁷Nchuhn che a nihnevaco ne ne, hua tehche ne ndahta yahn ne. Me nchuhn che metah cahnevaco ne ne, hua nuhn ne ndahta. ²⁸Nchuhn, sahn decahya che cahnevaco ne ne, hua dehve rahco ne, hua nunde chemin. Me nchuhn, tahn decahya che cahnevaco ne ne, hua nunde chemin. Ate adecoduhno nchuhn che cahnevaco ne ne,

acādeno che yah cuahno ne. Ráhn rí nchuhn cava che ndah yahn ne che tahque ndahca yahn ne che hua cahnevaco ne.

²⁹Dihnó, ráhn rí nchuhn te caviyan deman ne, conahn che ndihco cade Dendiohs. Man ne, nchuhn che nihnevaco ne ne, hua deman cava ndahta yahn ne ndedecadino ne. Menan vihca condedecadino ne nan ntiyon yahn Dendiohs. ³⁰Nchuhn che ran ne ne, hua deman vederan cuahte ne. Nchuhn che yeno ne ne, hua deman vedeyeno cuahte ne. Nchuhn che ra ne dehtenduh ne, hua cahco ne vedechahtino yahn ne nan dehtenduh chemin chan. Codin ne cuande anduhneca ndete che metah dehva yahn ne. ³¹Nchuhn che ndah rahno ne, chenán ne iyehñse ne, nde hua co yeno ne cava chemin, te nducuahn che va iyehñse cuh ne, a nihnde cade yahn che va che cuihno.

³²Nahn che hua denduh ino nchuhn. Sahn che metah cahnevaco se ne, va man ino se, redin se ntiyon yahn Dihvo vo Jesucristo, nahn se che co yeno ye. ³³Ate sahn che quenán cuma se ndahta yahn se ne, rendedecadino se yahn vederetahn yahn se, nahn se che co yeno ndahta yahn se. ³⁴Atihnoça rahno ri tahn ndahta. Tahn che hua quenán cuma te inchahn te ne, va man ino te, redin te ntiyon yahn Dihvo vo Jesucristo numa ino te, ndi vih te cava Dendiohs. Ate tahn che quenán cuma te inchahn te ne, rendedecadino te yahn ntiyon yahn te vaco te, nahn te che co yeno inchahn te.

³⁵Tihca dirún yahn nchuhn cava che ndah yahn ne, ndiyu che rihca tán che cahnevaco ne. Nahn che runecade cuahtenan ne iyehñse, va man ino ne, din ne ntiyon yahn Dihvo vo Jesucristo.

³⁶Che lado yahn ne, rahco che tahque ndah che cuahteman ihyan decahya. Ate nchuhn che vate tahn cahya yahn ne ne, ndete che rahco ne che tahque ndah che cahnevaco nun te che co che cuahtenan te, co ndico te ne, co decahnevaco ne tahn, hua nunde chemin. ³⁷Me nchuhn che a ndedecadino ne, a chihco ne chedave yahn ne che tahque ndah che hua decahnevaco ne tahn daya ne ne, hua dehve rahco ne, te namin ndahca che tihca din ne. ³⁸Nducote tihca ne, ihyan che redcahnevaco ye daya ye ne, ndahca redin ye, ne ihyan che hua redcahnevaco ye daya ye ne, nde tahque ndahca redin ye.

³⁹Ihyan ndahta che nihnevaco ye ne, a ndihco cade Dendiohs che hua tehche ye inchahn ye nde nda ro che coh ye. Ndete che coh inchahn ye ne, co ndaconan cahnevaco ye nduco adecoduhno ihyan che namin ritahno ye Dihvo vo Jesucristo. ⁴⁰Ate che lado yahn ne, rahco che tahque ndahca cava ye ndete che metah ndaconan cahnevaco ye. Tihca dirun, te co tihca nahn Vaco Ndah yahn Dendiohs.

Vedino che rihco ihyan nan dehtenduh che ndere redin ye dendiohs yahn ye

8 ¹Man ne, te cuandé nchuhn yahn vedino che rihco ihyan nan dehtenduh che ndere redin ye dendiohs yahn ye. Nducoyaco vo ne, devano tumacadino vo yahn dehtenduh. Chemin ne, co din che din yade vo, ate hua co din che ndahca cuahtenan vo nduco vih nan Dendiohs, te atenan che chenan cumo vo vedeyahino nduco vih che ndahca cuahtenan vo nan ye. ²Adecoduhno vo che ama devano vo, che rahco vo ne, rihnech man vo uvo, te nde hua devano vo nduhca che redin yahn. ³Ate ndete che yahino vo Dendiohs ne, nda cuande ye uvo.

⁴Me yahn che chuh vo dehtenduh che rihco ihyan nan dehtenduh che ndere redin ye dendiohs yahn ye ne, hua cahnda. A devano vo te dehtenduh che ndere redin ihyan dendiohs yahn ye ne, metah vederihquentiyon yahn, anduhneca ndete che hua dehva. Va ama no Dendiohs. ⁵Tihca, te andahre ama va dehtenduh che ndere redin ihyan dendiohs yahn ye man, dihve ye man, chenan nan ro man, ndiyahn man, ⁶ate cava uvo che ritahno vo Dihvo vo Jesucristo ne, va ama no Dendiohs. A ihyan min che Chido vo. A man ye dendah ye nducuahn dehtenduh che va. Dendah ye uvo cava ye. Namin va ama no Dihvo vo Jesucristo. Nduco ye Chida ye dendah ye uvo man, nducuahn dehtenduh che va man.

⁷Ate hua nducoyaca dihno vo retumacadino ye che metah vederihquentiyon yahn dehtenduh che ndere redin ihyan dendiohs yahn ye. Neve ye ne, nducote nevahnecon ye dehtenduh chemin chan ro menan ne, chenun ca vedevah min ihyan. Chemin che nde meniyon ndete che adenan cheh ye dehtenduh che ndi vedino nan dehtenduh chemin chan ne, cuahtendihco ye nunde, che rahco ye, te metah tumacadino

ye te vedino chemin chan hua dehva niyahn. ⁸Ndete che chuh vo vedino chemin chan ne, ndiyu chemin din che tahque co chihvo vo ñan Dendiohs, nde huane che hua chuh vo din che detohnan vo. Devano vo te ndiyu che reh vo redin che renan ino Dendiohs uvo. ⁹Nchuhn che a devano ne che hua dehva niyahn vedino chemin chan ne, cuihco ne cudado çava dihno ne che metah conahn ndah ye yahn. Hua ndahça che çava ne, detohnan ye chedave yahn ye, cuahtedihco ye nunde. ¹⁰Ndete che adenan ndihchero ye nchuhn che vate ne yaco ñan che vate dehtenduh che ndere redin ihyan dendiohs yahn ye, reh ne ne, nduco ye çahquino ye cheh ye che ndi vedino ñan dendiohs chemin chan, ¹¹ne detohnan ye chedave yahn ye, cuahtendihco ye nunde. Nduco tihça ne, çava nchuhn che devano ne che hua çahnda che cheh ne ne, ndaça yune che tohnan chedave yahn dihno ne che metah conahn ndah ye. Cuenecaçhco ne te namin çava ihyan min chih Dihvo vo Jesucristo, ndedevahn ye ihyan. ¹²Ndete che hua çahco nchuhn cudado ne, denan tihyon yune ne dihno ne çava che detohnan ye chedave yahn ye, ne man ne cuahtendihco ne nunde ñan Dihvo vo Jesucristo. ¹³Nducote tihça ne, nahn che din vo cudado. Ndete che va dehtenduh che rahco dihno vo che çahnda che cheh ye ne, tahque ndah che hua chuh vo dehtenduh chemin chan, çava che hua ndaça yune che detohnan ye chedave yahn ye, cuahtendihco ye nunde.

Vederihquentiyon che chenan cuma ihyan apóstol

9 ¹A chitahnó Dihvo vo Jesucristo, ndeváhn. Quenan cumá vederihquentiyon, ndí apóstol yahn ye. Mán ndihcheró Dihvo vo. A u tihyon yuné nchuhn che chitahno ne ihyan. ²Andahre vate ihyan che hua renevahneacun ye u nduhça apóstol, ate nchuhn che cuaco ne, a devano ne che ndí apóstol, te a u che cahndudó ndudo ndah yahn Dihvo vo Jesucristo, chitahno ne, ne nduco chemin ndero ndi che quenan cumá vederihquentiyon yahn ye.

³Tuhça rendahconán yahn ihyan che rendahchenan ye ntiyon che redín. ⁴Nuhn ne, chenan cuma nuhn vederihquentiyon, ndi nuhn apóstol, ne quenan cuma che te ihyan ndiyaco che chuhnun nuhn. ⁵Namin co cahnevaco nuhn nduco ama cahvo vo, conduco ye nuhn ñan che vatechica

nuhn nduhc̄a che redin dihno Dihvo vo Jesucristo man, Pedro man, ihyan apóstol chenahn man. ⁶U nduco Bernabé ne, namin chenan cuma nuhn vederihquentiyon min, nde hua redin fuerza che din nuhn tama nan ntiyon cava che ndaca che chuñun nuhn. ⁷A devano nchuhn te nducoyaca sandado ne, ndiyu nan ntiyon yahn man se riquendah che rechuhnun se. Namin ihyan che rihche ye dihyo uva ne, reh ye ndute yahn. Atihnocano tun ihyan che redin ye cudado chivato, te rih ye leche yahn te. ⁸⁻⁹Hua rahco nchuhn che che nahn man che tihca dirun yahn ne, te yahn chemin ne, a tihyon yan Moisés ama vederihquentiyon, dirun ye tuhca: “Hua dechiche duto itenine che redendeh te trigo cava che tiviyato, te ri yahn te nahn cheh te.” Chihquentiyon Dendiohs che tihca, dirun Moisés, ndiyu deman yahn che redin ye cudado ite, ¹⁰te nduco ejemplo min cah ye, checadino ihyan che nducoyaca ihyan che redin ye ntiyon yahn ye ne, a nan ntiyon min quendah che cheh ye. Tihca, te ihyan che ruhn yahn man, ihyan che rene din dave ye trigo man ne, redin ye ntiyon min, chenan ino ye che ndeva ye ndute ndata. ¹¹Namin nuhn che redin nuhn ntiyon yahn Dendiohs, cahndudo nuhn ndudo ndah yahn Dihvo vo Jesucristo, chitahno ne ne, redin yahn che te ne che chuñun nuhn. ¹²Ihyan chenahn ne, nducote rechah nchuhn nduhc̄a che redin yahn che rechuhnun ye ne, tahque ca nuhn, va che te ne, chuñun nuhn.

Andahre quenán cuma che conan ne nuhn, te ne che chuñun nuhn, ate nde hua chica nuhn nchuhn. Tahque ndah ne, din chahtino nuhn, te hua nahn denduh nuhn nchuhn cava che hua co vahche yahn ne che cotahno ne ndudo ndah yahn Dihvo vo Jesucristo. ¹³A devano nchuhn te ihyan che redin ye ntiyon chete yaco man, chidocuyan che chéñun ye nan ta man ne, a nan ntiyon min va che quendah che chuñun ye. ¹⁴Namin tihca chihco cade Dihvo vo Jesucristo che ihyan che rahndudo ye ndudo ndah yahn ye ne, a nan ntiyon min quendah che chuñun ye. ¹⁵Andahre redin yahn che nan ntiyon min quendah che chuñun ne, ate nde hua retumacah yahn chemin, nde huane cava che conan nchuhn u che tihca dirun. Ndihcó che nde ro che cóh ne, nde ama ihyan hua cahnevi ye vedeyeno yahn che hua nan ntiyon yahn Dihvo vo Jesucristo quendah che chuñun.

¹⁶Ndiyu yahn che nahn din yadé che rahndudó ndudo ndah yahn ye, te a chemin va che dín. Tihcá, te ama vedín ndete che hua dináhn yahn ye. ¹⁷Chemin che rahndudó numacuahn vedeyeno yahn man, ne nuhnde menun yáhn. Ate ndete che rahndudó andahre hua náhn ne, atanocá nduh rihco ró che ndihco Dendiohs ntiyon min táh. ¹⁸Vedeyeno yáhn ne, che cuahndudó ndudo ndah yahn Dihvo vo Jesucristo, dín tama nan ntiyon cava che ndaca che chuhnún, te hua náhn che nan ntiyon yahn ye quendah che chuhnún andahre tihcá va cade.

¹⁹Andahre hua va che cochicá nduhcá che nahn ama o ihyan, ate tihcá redín cava che ndaca yune che tahque co yahn ihyan, cotahno ye Dihvo vo Jesucristo. ²⁰Cuahn che renún van ihyan nación yahn Israel, ihyan chahn che renevahnecun ye ley che dirun Moisés ne, ri dama ndudó nduco ye, redináhn dama nduco ye ley min andahre ametah va che dináhn. Tihcá redín cava che co yeno ye, ne cotahno ye Dihvo vo Jesucristo. ²¹Namin no tun cuahn che renún van ihyan nación chenahn, che hua renevahnecun ye ley min, ndiyu che hua redináhn vederihquentiyon yahn Dendiohs man, Dihvo vo Jesucristo man, ate ri dama ndudó nduco ihyan chahn cava che co yeno ye, cotahno ye. ²²Cuahn che renún van dihno vo che hua renahn ndah ye vederihquentiyon yahn Dendiohs ne, redin chahtinó yahn ye cava che te yune ye che cah cuande ndáh ihyan. Tihcá redín nduco nducoyaca ihyan. Hua rendahchenán nde ama nan che redín ye cava che co yahn ye, cotahno ye Dihvo vo Jesucristo. ²³Ama rihcó cudado nduhcá che quechicá van nducoyaca ihyan, te nahn che co yahn ye, cotahno ye ndudo ndah yahn Dihvo vo Jesucristo, ndeváhn dama nduco ye.

²⁴A devano nchuhn nduhcá che rano ihyan cade. Yahn ye rano ye nduco vih, ate ama no ye richa ye, ndonda táh ye premio yahn ye. Nduhcá ihyan che tahque dito chano ye ne, tihcá cuiquendi nchuhn numa ino ne, dinahn ne vederihquentiyon yahn Dihvo vo Jesucristo nde nda ro che ndahco menun Dendiohs yahn ne. ²⁵Nducoyaca sahn che reduche se ne, redin se cudado sahn yahn nducuahn dehtenduh che co din che denda se, te nahn se che cocha se cava che ndonda táh se premio yahn se. Premio chemin chan ne, nun rihno. Ate uvo ne, che ndahco menun Dendiohs yuhn

vo ne, hua cuihno. ²⁶Nduhca sahn che rano se numa ino se man, nduhca sahn che reduce se numa ino se man ne, tihca redin. ²⁷Nduhca che ama redin sahn chahn cudado sahn cava che hua denda se ne, tihca ama rihco cudado nan nducuah che redin, te cuihno che ama riyahve ihyan chenh che cahco ye cudado ne, hua nahn che denan denda man.

Yahve Pablo uvo che hua nevahnecon vo dehtenduh che ndere redin ihyan dendiohs yahn ye

10 ¹Dihnó, nahn che cadino ne che nducoyaca ihyan ndico yuhn vo ne, chahtechica ye nduco vih man man che quendihco nan ro me. Namin chuh ye dama nduco vih mendahn reche Nuniyahn Cuah. ²Tihca chinduco nducoyaca ye Moisés, chahtechica ye nduco vih man man me, ne chuh ye nduco vih mendahn nuniyahn me, anduhneca ndete che dama chedenune ye nduco vih. ³Dama cheh ye nduco vih che cah Dendiohs. ⁴Namin adecotino che chahtechica ye nduco vih ne, chih ye nune che quendah nan yava me che cah Dendiohs ihyan. Yava min ne, anduhneca Dihvo vo Jesucristo. ⁵Andahre ama din Dendiohs vederihno nduco ye ne, ate a nahn nducoyaca ye chahcotahn ye yahn ye, ne chemin che din Dendiohs castigo ihyan, chih ye yahn nan che metah duhva.

⁶Nducuah che chahno chi ihyan chahn ne, cochihve yuhn vo ndete che cua cuande vo yahn cava che hua cuahcotahn vo yahn vedeyahino yahn Dendiohs nduhca che din ye. ⁷Hua quendi nchuhn yune yahn ihyan chahn, te ama yahn ye ne, nevahnecon ye dehtenduh ndere din ye dendiohs yahn ye. A devano vo che tihca din ye, te a ndirun nan Ndudo yahn Dendiohs tuhca: “Ndo dama ye nan chemin ca che ndere din ye dendiohs yahn ye, cheh ye man, chih ye man, chahte vihco ye man.” ⁸Hua cuahtenan nchuhn nduco ihyan che hua nihnevaco nduco ne nduhca che din ama yahn ihyan chahn, ndere chahtechica ye. Din Dendiohs castigo ihyan chahn, chih tenduh ndico ino mil ye che ama ro no. ⁹Hua cuahcotahn nchuhn yahn Dihvo vo Dendiohs, din ne che co doh ino ye nduco ne nduhca che din ama yahn ihyan chahn. Din Dendiohs castigo ihyan, ne cah cu ihyan, chih ye. ¹⁰Hua cahma nunde nchuhn yahn Dendiohs nduhca che chahn nunde ihyan chahn. Din Dendiohs castigo ihyan, dechuh ye ama angel, cah ye cah ihyan, chih ye.

¹¹Nducuahñ dehtenduh che tihchan chahno chi ihyan ndico yuhn vo ne, chihquentiyon Dendiohs che quenán caca cava che, uvo che vato vo man ro cuh che a nun cuihno iyehñse ne, cua cuando vo, ne hua ndere din vo. ¹²Nducote cahnda yuhn vo ne, duh nchuhn che hua dehva co yahn ne, che rahco ne ne, cuihco ne cudado che hua denan condihco ne nunde. ¹³Nchuhn ne, retumarande chundah nchuhn nahñ cuan, rechuhrihn ne nduhca che rechuhrihn ihyan chenahn. Ate Dendiohs ne, redinahñ ye ndudo yahn ye, ne hua cuahñecun ye che chuhñan chuhrihn ne. Tahque ndah ye ne, conan ye nchuhn ura che retumarande sahn min nchuhn cava che cocha ne.

¹⁴Dihno che yahino nchuhn, nducote cahnda Dendiohs yuhn vo ne, cuihco ne cudado. Hua ndeva ne yavenan dehtenduh che ndere redin ihyan dendiohs yahn ye. ¹⁵Nchuhn ne, ihyan renahn ne, ne a devano che conahn ne te cuaco ndudo che tihca dirun. ¹⁶Cuahn che rendo damo vo nduco vih nduhca che chihco cade Dihvo vo Jesucristo ne, recah vo nundihve cuahn Dendiohs cava vino, rih vo. Nduco chemin ne, rihco ro vo che ama no vederendedecadino yuhn vo, ritahno vo Dihvo vo Jesucristo che chera yun yahn ye, quenán yah ye nan cruz cavo vo. Namin no tun, ura che rendeh vo pan, reh vo ne, rihco ro vo che ama no vederendedecadino yuhn vo, ritahno vo ihyan min che chihco mendahn ye ihyan, chih ye cavo vo. ¹⁷Andahre yahñ ri vo, ate nducote ama no pan reh vo nduco vih ne, ndero ndi che a nto vo nduco vih anduhñeca ama no ihyan. ¹⁸Cuihco nchuhn cudado nduhca che ri van ihyan naciön yahn Israel. Nduco che reh ye nduco vih dehtenduh che ndi vedino nan ta ne, rihnde ro che ama no vederendedecadino yahn ye. ¹⁹Me dehtenduh che ndere redin ihyan dendiohs yahn ye ne, cuedevano nchuhn te metahñ de ama vederihquentiyon yahn. Atihñoca dehtenduh che rihco ye nan, ri vedino ne, hua cahnda, te hua dehva ri yahn. ²⁰Ate rahn ri nchuhn che hua nahñ che dama co ne nduco ye, te che tihca redin ye ne, a vaco chihnga che rinduco ihyan, ndiyu Dendiohs. ²¹Nchuhn che renevahñecun ne Dihvo vo Jesucristo, reh ne pan man, rih ne vino man, nduhca che chihco cade ye ne, hua ndahca che dama co ne nduco ihyan che rahte vihco ye, reh ye man, rih ye man, che rendeva

ye yavenan vaco chihnga. ²²A devano nchuhn te Dihvo vo Jesucristo ne, ama cahnda ye, ne hua ndahca che cahñ ne vedecahva ihyan. Ama vedin ne ndete che din ye castigo nchuhn.

Nduhca che nahn che cuahtenan cumo vo vedeyahino nduco vih

²³Cuaco che nducuahn che nahn vo ne, co din vo. Ate hua nducuahn redin yahn che din vo. Hua nducuahn co conan dihno vo che tahque cochahtino ye Dihvo vo Jesucristo.

²⁴Ndotenan che din vo dehtenduh che ri yeno man vo, tahque ndah ne, din vo dehtenduh che cochihve yahn ihyan chenahn.

²⁵Adecodeno che nahn cheh nchuhn ne, co cua ne ndihve. Nde hua ndedecadino ne yahn, nde hua tumerune ne ihyan yahn dehtenduh, a ndi vedino o hua, ²⁶te iyehñse nduco nducuahn che va ne, a Dihvo vo Dendiohs chihco ye.

²⁷Namin ndete che ama ihyan che hua ritahno ye Dihvo vo Jesucristo yahve ye nchuhn che cahñ ne, cheh ne nduco ye ne, co cahñ ne ndete che nahn ne. Cocheh ne adecodeno che cheh ye nduco ne, ne cava che hua chihnga co ino ye ne, nde hua tumerune ne a ndi vedino dehtenduh chemin chan o hua.

²⁸Atenan che man ye quendah chende ye, cahma ye co ye nchuhn che dehtenduh che chihco ye nan ne ne, a ndi vedino yahn dehtenduh che ndere redin ye dendiohs yahn ye, tuhme che cuaco ne, cava che hua ndedecadino ye ne, hua cheh ne.

²⁹Hua cheh ne, ndiyu yahn che cahnda yahn ne che cheh ne, ate cava che hua ndedecadino ihyan min.

Ama o nchuhn ne, co rendedecadino ne che co cheh ne adecodeno che nahn ne, ne rahco ne che nde hua nahn che din ne cudado, andahre chihnga co ino ihyan chenahn. ³⁰Rahco ne che nde hua redin yahn che ndahchenan ye yahn dehtenduh che reh ne, te reñcah ne nundihve cuahn Dendiohs cava chemin.

³¹Hua ndahca ndete che tihca ndedecadino ne. Tahque ndah ne, cuihco nchuhn cudado nan nducuahn dehtenduh che redin ne man, nan reh ne man, nan rih ne man, cava che ndaca yune che ndeva ihyan yavenan Dendiohs. ³²Hua cah yune ne che cava dehtenduh che redin ne conda nde ama ihyan, ihyan naci3n yahn Israel man, ihyan naci3n chenahn man, ihyan yahn Dendiohs che ritahno ye Dihvo vo Jesucristo man. ³³Me u

ne, a chihco in3 che d3n, ndiyu dehtenduh che ri yeno man, ate

dehtenduh che conan ino ihyan chenahn çava che ndaça yune che cotahno ye Dihvo vo Jesucristo, ndevahn ye.

11 ¹Nduhça che riquendí yune yahn Dihvo vo Jesucristo ne, tihça cuiquendi nchuhn yune yáhn.

Nduhça che va che nevahneacun ihyan ndahta chete yaco

²Dihnó, ama yenó che cuahn dama reneçahco nchuhn u, ne redinahn ne nducuahn che chicuáhn nchuhn. ³Namin nahn te cuandé nchuhn tama te o ndudo che náhn che cadino ne. Dendiohs Chida ne, ihyan min che rihquentiyon ye Dihvo vo Jesucristo. Jesucristo ne, ihyan min che rihquentiyon ye ihyan çahn. Ihyan çahn ne, ihyan chahn che rihquentiyon ye ihyan ndahta yahn ye. ⁴Ihyan çahn ne, cahtera ye vedecuino yahn ye ndete che cuahco ye payon tin ye ura che covah ye o cuahndudo ye Ndudo yahn Dendiohs. ⁵Me ihyan ndahta ne, cahtera ye vedecuino yahn ye ndete che hua cuahco ye payon tin ye ura che covah ye o cuahndudo ye Ndudo yahn Dendiohs, te ndete che tihça ne, anduhneca ndete che ndu rah ye tin ye. ⁶Ndete che hua cuahco ye tin ye ne, tahque ndah che ndu rah ye. Atenan che cuihnan ye ndu rah ye ne, tuhme va che cuahco ye payon. ⁷Ihyan çahn ne, hua redin yahn che cuahco ye tin ye, te dendah Dendiohs ihyan çava che co ro taça man ye man, taça vederihquentiyon yahn ye man. Me ihyan ndahta ne, dendah Dendiohs ihyan çava che çahco ro ye vederihquentiyon yahn inchahn ye. ⁸Tihça, te dinoca dendah Dendiohs ihyan çahn, ne adiva dendah ye ihyan ndahta. ⁹A çava ihyan çahn che dendah ye ihyan ndahta. Ndiyu çava ihyan ndahta quenana cuma che dendah ye ihyan çahn. ¹⁰Chemin che va che cuahco ihyan ndahta payon tin ye çava che çahco ro ye nan ihyan man, nan ángel man, che nevahneacun ye vederihquentiyon yahn inchahn ye. ¹¹Andahre tihça ne, ate van uvo che ritahno vo Dihvo vo Jesucristo ne, nde ndahta, nde çahn, rigonun chihve. ¹²Andahre çava ihyan çahn che dendah Dendiohs ihyan ndahta, ate nde ro min ne, a ihyan ndahta che racoyahn ye ihyan çahn.

A Dendiohs che chihco çade ye nducuahn

¹³A devano man nchuhn te hua ndahça che hua cuahco ihyan ndahta payon tin ye ura che covah ye. ¹⁴A namin no tun

ama vedecuihno che cuahnecun ihyan chahn che co rahno yudo tin ye. ¹⁵Ate ihyan ndahta che cuaco ne, redin yahn che cuahtenan cuma ye yudo tin ye che rahno, te richihve cava che chendih tin ye. ¹⁶Me ihyan che canda tin ye che hua conan ino ye che tihca te cuandé ne, codevano ye te nuhn man, ihyan yahn Dendiohs yahn nducuahñ yaco man, hua chenan cuma nuhn costumbre che cuhma chende nuhn.

Ihyan ndiyaco ne, renevih Pablo nunde yahn ye vaconan ye

¹⁷Man ne, dirun yahn nchuhn yahn ama nan che hua ndahca redin ne, ne yahn chemin ne, hua co ndevá yavenan ne. Cane cuahn che rendo dama ne ne, ndotenan che cochihve yahn ne ne, deredinda ne, ¹⁸te rahn ihyan ri ye u te cuahn che rendo dama ne yaco ne, ri ro che ndeh cuan ndi ne. Tah ne, ritahnó, ne tah ne, hua ritahnó, ate rahcó te co cuaco nahn ndudo che rahn ye. ¹⁹Va che ndeh cuan co ne, te min co ro cha nchuhn che ritahno ne numa cuaco Dihvo vo Jesucristo. ²⁰Cuahn che rendo dama ne, rih ne vino man, reh ne pan man, nduhca che chihquentiyon Dihvo vo Jesucristo ne, nducote ndeh cuan ndi ne ne, ndero ndi che hua numacuahn chedave yahn ne, ²¹te ndere vihco no che redin ne. Nahn nchuhn ne, reh nduh ne dehtenduh che riquenda ne. Nahn ne ne, hua rendaca reh ne. Nahn ne ne, nde ricoh ne. ²²¡A chunnan cuahn che tihca redin nchuhn! ¿Ametah ndevaco ne, che cuahtenun ne, cheh ne man, cuh ne man? ¿Dehco che redin duche yahn ne ihyan yahn Dendiohs? ¿Taca rahco ne che rihtera ne vedecuihno yahn dihno vo che metah dehva yahn ye? Cua nchuhn tah vedecuihno. Che tihca redin ne ne, hua co ndevá yavenan ne.

Nduhca che chihco cade Dihvo vo Jesucristo che cheh ihyan pan man, cuh ye vino man

²³Hua tihca chicuahn nchuhn vederihquentiyon che ndahco Dihvo vo Jesucristo tahn. Tuhca vederihquentiyon min: Vino che va che necah ndeh se Dihvo vo Jesucristo, co ye preso ne, ura che cheh vino ye ne, chetah ye pan, ²⁴necah ye nundihve cuahn Dendiohs. Tuhme ndeh ye, ne rahn ye: “Cocheh nchuhn. Chu ne, yute yahn. Va che nuhn yah ihyan u cava nchuhn. Tuhca codin ne, cuenecahco ne u.” ²⁵Chihno cheh vino ye ne, namin chetah ye ama vaso vino, ne rahn ye:

“Vino cuh ne, yun yáhn che cora cava che conahn trato ra che ndahco cade Dendiohs. Queri ama yune che tihca cuh ne ne, cahco ro ne che renecahco ne u.” ²⁶Ráhn rí nchuhn te nduco tihca ne, cahco ro ne che renecahco ne Dihvo vo Jesucristo, te nde ro che ndaconan chi tun ye ne, queri ama yune che cheh ne pan man, cuh ne vino man, nduhca che chihco cade ye ne, cahco ro ne che renecahco ne nduhca che chih ye.

²⁷Nducote cahnda vederihquentiyon min ne, adecoduhno ihyan che cheh ye pan man, cuh ye vino man, ate hua nduhca che chihco cade Dihvo vo Jesucristo ne, condihco ye nunde che din duche yahn ye che chih Dihvo vo man, che chera yun yahn ye man. ²⁸Chemin che nahn che dinoca ndedecadino ihyan tachan ihyan ye, tuhme nduco vedino vedenecon cheh ye pan man, cuh ye vino man, nduhca che chihco cade Dihvo vo. ²⁹Tihca va che din ye cudado, te ihyan che ndere cheh ye, ndere cuh ye, che nde hua ndedecadino ye deh cuande ne, rihco yan man ye castigo che co ye yahn che duche rino ye Dihvo vo Jesucristo. ³⁰A yahn nunde min che nahn dihno vo van nchuhn ne, ndi ye cah cuno, ne nahn ye ne, ndi ye tama te o nan cah, ne nahn ye ne, a chih ye. ³¹Ate ndete che cahco vo cudado yahn vederihquentiyon min ne, hua conan cuma Dihvo vo Dendiohs che din ye castigo uvo. ³²Ate che redin ye castigo uvo man ro cuh ne, che nahn ye che nto ino vo nunde yuhn vo cava che hua conda vo dama nduco ihyan nunde.

³³Dihnó, chemin che cuahn che ndo dama nchuhn, cheh ne pan man, cuh ne vino man, nduhca che chihco cade Dihvo vo Jesucristo ne, cuahtenan rino ne vih. ³⁴Ndete che cuico ne ne, tahque ndah che cuahte ne, cheh ne ndevaco ne che co che cahne ndiyaco, ndere cheh ne, ne conan cuma Dendiohs che din ye castigo nchuhn. Me yahn dehtenduh chenahn ne, nte cade vo nduco nchuhn cuahn che chí quendihcheró nchuhn.

***Vederihquentiyon che recah Vaco Ndah yahn Dendiohs
queri ama ihyan che ritahno ye Dihvo vo Jesucristo***

12 ¹Dihnó, nahn che codevano nchuhn yahn ndeh nan vederihquentiyon che rete Vaco Ndah yahn Dendiohs, chenano como vo. ²A devano nchuhn te cuahn che metah cotahno ne Dihvo vo Jesucristo ne, ndeva ne yavenan dehtenduh che nde hua ri rahn, che ndere redin ihyan

dendiohs yahn ye. ³Nducote nahn che codevano ndah nchuhn ne, chemin che rete cuandé nchuhn che adecoduhno ihyan che cahva ye yahn Dihvo vo Jesucristo ne, ndiyu Vaco Ndah yahn Dendiohs che rihquentiyon ihyan. A namin no tun, adecoduno ihyan che cahma ye che Jesucristo che Dihve ye ne, a Vaco Ndah yahn Dendiohs che rihquentiyon ihyan.

⁴Van nducoyaco vo ne, ama ndeh nan vederihquentiyon che chenan cumo vo, ate a ama no Vaco Ndah yahn Dendiohs che rete. ⁵Ama ndeh nan ntiyon che redin nducoyaco vo, ate a ama no Dihvo vo Jesucristo. ⁶Ama ndeh nan ntiyon chenan cumo vo, ate ama no Dendiohs che redin ye che rinahn nducuahn. ⁷Queri ama vo ne, rete Dendiohs vederihquentiyon yahn Vaco Ndah yahn ye, chenan cumo vo cava che ndah yahn nducoyaco vo. ⁸Nahn vo ne, redin Vaco Ndah yahn ye che rihnde tah vo vederihquentiyon che co cahmo vo numacuahn vededevano. ⁹Nahn vo ne, che cotahno vo. Nahn vo ne, che din vo che ndoyahn ihyan cah. ¹⁰Nahn vo ne, che din vo vederihno. Nahn vo ne, che cuahndudo vo ndudo che te Dendiohs. Nahn vo ne, che tumacadino vo cha ihyan che quenun Vaco Ndah yahn Dendiohs ihyan, ne cha ye che quenun vaco chihnga ihyan. Nahn vo ne, che cuahndudo vo tama te o nan devaco. Nahn vo ne, che co cah cuande vo deh conahn ndudo che cuahndudo ihyan devaco chemin chan. ¹¹Andahre ama ndeh nan vederihquentiyon chemin chan, ate a ama no Vaco Ndah yahn Dendiohs che rete queri ama vo tunoca che nahn man.

***Nducoyaco vo che ritahno vo Dihvo vo Jesucristo
ne, ndi vo anduhneca ama no ihyan***

¹²Hua ndeh cuan ndi vo nduco vih, te andahre ama yahn ri vo, ate ndi vo anduhneca ama no ihyan, ndi cuande vo yahn Dihvo vo Jesucristo. ¹³Tihca, te andahre ihyan naci3n yahn Israel, o ihyan tama naci3n uvo, andahre chenan cumo vo dihvo vo, o rihquentiyon man vo uvo ne, ate a ama no Vaco Ndah yahn Dendiohs nedin dama uvo, din che ndo vo anduhneca ama no ihyan, quenun queri ama vo.

¹⁴Ihyan ne, chenan cah ye man, chenan tah ye man, chenan nducuahn dehtenduh yahn ye man. ¹⁵Andahre che cahma cah ama ihyan: “U ne, hua tah ye u, ne chemin che hua ndi

cuandé yahn ye”, ate ndiyu cava chemin che co din vih.

¹⁶Andahre cahma revan ama ihyan: “U ne, hua ndutinan ye u, ne chemin che hua ndi cuandé yahn ye”, ate ndiyu cava chemin che co din vih. ¹⁷Ndete che ndutinan no ihyan chenane, ametah deh nduco che cahnevan ye. Ndete che revan no ihyan chenane, ametah deh nduco che tahno ye. ¹⁸Ate hua tihca, te Dendiohs ne, numa dendah ye ihyan nduhca che nahn man ye. ¹⁹Ndete che deman cah ihyan ne, nde hua cochihve ye. ²⁰Ate che cuaco ne, andahre ama ndeh nan dehtenduh yahn ihyan, ate ama no ye.

²¹Hua redin yahn che cahma ndutinan ihyan co tah ye: “Hua rendotenán nchuhn.” Namin hua redin yahn che cahma tin ye co cah ye: “Hua rendotenán nchuhn.” ²²Hua redin yahn che tihca, te queri ama ne, rendotenan vih. Nde dehtenduh che rivahn che hua nduh richihve ne, chemin che nde tahque richihve. ²³Dehtenduh che hua nduh rigonun chihve, che rahco vo ne, chemin che tahque ndah redin vo cudado. Namin dehtenduh che hua redin yahn che co ro ne, chemin ne, tahque nduco cudado chenane cumo vo ²⁴che co dehtenduh chenahn. Tihca chihco cade Dendiohs che tahque din vo cudado dehtenduh yuhn vo che hua nduh rigonun chihve, che rahco vo, ²⁵cava che, ndotenan che devavih co ne, ama cuan no co, conan vih. ²⁶Ndete che rechuhrihn ama nan dehtenduh yuhn vo ne, rechuhrihn numachahto vo. Namin ndete che yan ama nan dehtenduh yuhn vo ne, yan numachahto vo.

²⁷Namin van nducoyaco vo ne, chenane cumo vo ndeh nan vederihquentiyon, ndi vo anduhneca ama no ihyan, ndi cuando vo yahn Dihvo vo Jesucristo. ²⁸Dendiohs ne, te ye vederihquentiyon yahn queri ama vo. Nahn vo ne, te ye vederihquentiyon che tahque chahte che co vo apóstol. Nahn vo ne, che cuahndudo vo ndudo che te ye. Nahn vo ne, che cacuahno vo Ndudo yahn ye. Namin te ye tama te o nan vederihquentiyon nahn vo che hua nduh quenun yan. Nahn vo ne, che co din vo vederihno. Nahn vo ne, che co din vo che ndoyahn ihyan cah. Nahn vo ne, che conan vo chete yaco. Nahn vo ne, che cahcantiyon vo chete yaco. Nahn vo ne, che cuahndudo vo tama te o nan devaco. ²⁹Hua nducoyaco vo va tah vo vederihquentiyon yahn apóstol. Hua nducoyaco vo va tah vo vederihquentiyon che cuahndudo vo ndudo che rete

Dendiohs. Hua nducoyaco vo va tah vo vederihquentiyon che cacuahñ vo ndudo yahn ye. Hua nducoyaco vo va tah vo vederihquentiyon che din vo vederihno. ³⁰Hua nducoyaco vo va tah vo vederihquentiyon che co din vo che ndoyahn ihyan cah. Hua nducoyaco vo va tah vo vederihquentiyon che cuahndudo vo tama te o nan devaco. Hua nducoyaco vo va tah vo vederihquentiyon che cah cuande vo deh conahn devaco chemin chan. ³¹Ndete che ama nahn cuahtenan cuma nchuhn ama vederihquentiyon chemin chan ne, codin nun ino ne che co cuhnde tah ne vederihquentiyon che tahque cochihve. Ate te cuandé nchuhn tama nan che nde tahque nahn che cuahtenan cumo vo.

Nahn che cuahtenan cumo vo vedeyahino

13 ¹Andahre co cuahndudo vo tama te o nan devaco, andahre devaco yahn ángel, ate ndete che hua chenán cumo vo vedeyahino ne, ndi vo anduhneca tambu man, cu dan che ndere rahco man. ²Namin andahre rahndudo vo ndudo che rete Dendiohs uvo, andahre ama chenán cumo vo vededevano che nde hua devano ihyán, andahre ama ritahno vo Dendiohs che nde cocha vederihquentiyon che chenán cumo vo che ndacorun ama icoyahn, cuhnde tama cuan, ate ndete che hua chenán cumo vo vedeyahino ne, nde hua cochihvo vo. ³Andahre cuihno ndihco vo nducuahn dehtenduh che va yuhn vo, conan vo ihyán chevah, andahre cahco mendahn vo uvo, cuihno cuco vo, ate ndete che hua chenán cumo vo vedeyahino ne, nde hua cochihve yuhn vo. ⁴Ndete che chenán cumo vo vedeyahino ne, chahtino vo man, cuno ino vo man, hua din ve vo man, hua din yade vo man, hua din cun vo man, ⁵hua ndere din vo man, hua din idihya vo man, hua ndere co tan vo man, hua cuahtenun ino vo vedecahva man, ⁶hua co yeno vo yahn ihyán che rendihco ye nunde man. Tahque ndah ne, cuahtenan cumo vo vedeyahino. Tuhme co yeno vo yahn ndudo cuaco, ⁷ne yahn nducuahn dehtenduh ne, nevahñecun vo man, din chahtino vo man, cuahtenan ino vo man.

⁸Nda ro che cuihno vederihquentiyon che cuahndudo vo ndudo che rete Dendiohs man, che cuahndudo vo tama te o nan devaco man, che cuahtenan cumo vo vededevano man,

ate vedeyahino ne, hua cuihno. ⁹Va che cuihno nducuahñ vederihquentiyon chemin chan, te hua numa. Hua numa vededevano che chenan cumo vo man, hua numa rahndudo vo ndudo che rete Dendiohs man. ¹⁰Ate cuahn che ndahco cade Dendiohs vederihquentiyon che numa ne, cuihno che hua numa.

¹¹Cuahn che cahya uvo ne, rente vo man, rendedecadino vo man, renahn vo man, nduhca checahya. Ate cuahn che chi ndico vo ne, chihcoman vo nduhca che redin checahya. ¹²Tihca, te man ro cuh ne, anduhneca ndete che ama cheh ro dehtenduh man, hua ndah renahn vo man. Ate nda ro min ne, nduhca che rendihche ndah Dendiohs uvo ne, tihca conahn ndah vo yahn nducuahñ dehtenduh. ¹³Nducote tihca ne, va che quendi vo ino nan vederihquentiyon. Ama ne, che cotahno vo. Tama ne, che cuahtenan ino vo. Tama ne, che cuahtenan cumo vo vedeyahino. Me che cuahtenan cumo vo vedeyahino ne, chemin che tahque rignonun chihve che co vederihquentiyon chenhñ.

Vederihquentiyon che co cuahndudo vo tama te o nan devaco

14 ¹Codin nun ino nchuhn che cuahtenan cuma ne vedeyahino, namin che cuahtenan cuma ne vederihquentiyon yahn Vaco Ndah yahn Dendiohs, menan vihca che cuahndudo ne ndudo che rete ye. ²Chemin che tahque nahn, te cuahn che redin Vaco Ndah yahn Dendiohs che rahndudo ihyan tama te o nan devaco ne, atenan Dendiohs renahn ye. ³Ate che rahndudo ye ndudo che rete Dendiohs ne, richihve yahn nducoyaco vo, redin che tahque numa ino vo ritahno vo Dihvo vo Jesucristo man, necah yan chedave yuhn vo man. ⁴Che rahndudo ihyan tama te o nan devaco che hua renahn vo ne, atenan cava man ye richihve. Ate che rahndudo ye ndudo che rete Dendiohs ne, richihve cava nducoyaco vo che ritahno vo Dihvo vo Jesucristo. ⁵Ama ndahca ndete che nducoyaca nchuhn cuahtenan cuma ne vederihquentiyon che cuahndudo ne tama te o nan devaco. Ate tahque ndahca ndete che cuahtenan cuma ne vederihquentiyon che cuahndudo ne ndudo che rete Dendiohs, te vederihquentiyon min ne, tahque rignonun chihve che co vederihquentiyon che rahndudo ihyan tama te o nan devaco,

atenan ndete che vate ihyan che te cuande ye uvo deh conahn devaco chemin chan. ⁶Dihnó, nducote tihca ne, hua cochihve yahn nchuhn ndete che chi cuahndudó tama te o nan devaco che hua conahn ne. Atenan che cuahndudó ndudo che te Dendiohs, o cacuahñ nchuhn Ndudo yahn ye, tuhme cochihve yahn ne.

⁷Anduhneca cu retive man, arpa man, che ihyan va che tive ye man, cuh ye man ne, ndete che a ndere cuah cuaco, o a ndere cuahco che hua nduco yuhno ne, nde hua cochihve. ⁸A namin no tun van canda ne, ndete che a ndere cuah cuaco corneta ne, hua conahn sandado yuhno yahn, ne nde ama se hua cuahteyan se che cuhma se. ⁹A chemin no cuahno co nchuhn ndete che cuahndudo ne deman devaco che hua conahn ne. A ndere cuahndudo ne devan yuhne. ¹⁰Cuaco te ama ndeh nan devaco va iyehñse, ne ihyan che rente ye devaco chemin chan ne, renahn ye yahn vih. ¹¹Ndete che cahmo vo devaco yuhn vo nduco ihyan tama naciñ ne, hua conahn ye. Namin ndete che cahma ye devaco yahn ye nduco vo ne, hua conahn vo. ¹²Tihca hua cochihve yuhn vo che cahmo vo ndudo che hua conahn vo. Ama ndahca che ama nahn cuahtenan cuma nchuhn vederihquentiyon yahn Vaco Ndah yahn Dendiohs, ate codin nun ino ne che cuahtenan cuma ne vederihquentiyon che din che nducoyaca nchuhn, ihyan ndiyaco ne, tahque numa ino ne cotahno ne Dihvo vo Jesucristo.

¹³Dihno vo che cuahndudo ye tama nan devaco che hua conahn nchuhn ne, nahn che caça ye Dendiohs che conahn ye, ne co te cuande ye nchuhn yahn ndudo che cuahndudo ye. ¹⁴Tihca, te ndete che covah vo nduco tama nan devaco che hua renahn vo ne, anduhneca ndete che vaco vo che revah, ate man vo hua renahn vo. ¹⁵Nducote tihca ne, nahn che covah vo nduco devaco che hua renahn vo, ate namin nahn che covah vo nduco devaco che renahn vo. Nahn che cato vo nduco devaco che hua renahn vo, ate namin nahn che cato vo nduco devaco che renahn vo. ¹⁶Ndete che necah vo nundihve cuahn Dendiohs nduco tama nan devaco che hua renahn ihyan che nduco ye uvo ne, hua necah ihyan chahn nundihve cuahn Dendiohs dama nduco vo, te hua devano ye deh che revah vo. ¹⁷Cuaco te numa ino vo co necah vo nundihve cuahn

Dendiohs nduco t̄ama n̄an dev̄aco. Ate nducote hua conahn dihno vo che nduco ye uvo ne, hua co din che tahque numa ino ye quendi ye cotahno ye Dihvo vo Jesucristo. ¹⁸Nchuhn ne, chenan cuma ne vederihquentiyon che rahndudo ne t̄ama te o n̄an dev̄aco. Namin u ne, quenán cumá vederihquentiyon min, ne reneçâh nundihve cuahn Dendiohs che tahque yudo vederihquentiyon min yáhn che co yahn nducoyaca nchuhn. ¹⁹Ate cuahn che quenún chete ȳaco v̄an dihno vo ne, tahque náhn che cuahndudó mare uhn ndudo che co conahn ye che co che cuahndudó ndiche mil ndudo āma dev̄aco che hua conahn ye.

²⁰Dihno, hua co nchuhn nduhc̄a chec̄ahya n̄an vederendedecadino yahn ne. Co ne nduhc̄a chec̄ahya n̄an dehtenduh che chihnga, hua cuahtendihco ne nunde. Ate n̄an vederendedecadino yahn ne ne, co ne nduhc̄a ihyan ndico. ²¹N̄an Ndudo yahn Dihvo vo Dendiohs ne, ndirun tuhç̄a: “Dechúh ihyan t̄ama nación, cuahndudo ye ndudo yáhn nduco dev̄aco yahn m̄an ye, cahnevan ihyan nación cuh. Ate nde nduco nduh ne, hua nevahneçun ye u.” ²²Nducote tihç̄a ne, devano vo te vederihquentiyon che cuahndudo ihyan t̄ama n̄an dev̄aco ne, a çava ihyan che hua ritahno ye che chihco çade Dendiohs, ndiyu çava ihyan che ritahno ye. Ate vederihquentiyon che rahndudo ihyan ndudo che rete Dendiohs ne, a çava ihyan che ritahno ye che chihco çade ye, ndiyu çava ihyan che hua ritahno ye. ²³Chemin che ndete che ihyan che hua ritahno ye Dihvo vo Jesucristo nd̄a ye chete ȳaco, ne ura min vari ne rahndudo nducoyaca ne ðamandahn t̄ama te o n̄an dev̄aco ne, ndedecadino ye che luco ne. ²⁴Ate ndete che ura che nd̄a ye rahndudo ne ndudo che rete Dendiohs ne, conahn ye, ne ndo ino ye, ²⁵tumacadino ye che quendihco ye nunde n̄an Dendiohs. Tuhme numacuahn vedeneçun nto ino ye nunde yahn ye, ndeva ye yaven̄an Dendiohs. Cuacotuhñ ye ndudo che cuçaco niyon che quenun Dendiohs v̄an nchuhn. ²⁶Dihno, tuhme ne, cuahn che ndo ðama nchuhn ȳaco ne, codinahn ne adecochano vederihquentiyon che nte Dendiohs nchuhn, a che çata ne salmo, a che cacuahn ne Ndudo yahn ye, a che cuahndudo ne ndudo che rete ye, a che cuahndudo ne t̄ama te o n̄an dev̄aco, a che çah cuande ne deh conahn dev̄aco chemin chan. Ate codin ne cuande che n̄an nducuahn dehtenduh che din ne ne, cochihve yahn nducoyaca ne çava che tahque numa

ino ne quendi ne cotahno ne Dihvo vo Jesucristo. ²⁷Cuahn che cuahndudo nchuhn t̄ama te o n̄an dev̄aco ne, hua d̄amandahn cuahndudo nducoȳaca ne, te ca āma ca āma ne cuahndudo ne. Av̄ane ne, queri āma yune che ndo d̄ama ne ne, co cuahndudo āma o ne, aten̄an cuahn ne, ino ne. Ate va che çah cuande āma cha nchuhn deh conahn dev̄aco chemin chan. ²⁸Ate ndete che ametah duh che te cuande ne, tahque ndah che çahma queri āma nchuhn chete chedave yahn ne, cahnevan Dendiohs, che co che cuahndudo ne van ihyan. ²⁹Namin ihyan che chenan cuma ye vederihquentiyon che rahndudo ye ndudo che rete Dendiohs ne, queri āma yune che ndo d̄ama ye ne, aten̄an o ino ye co cuahndudo ye, ne combiero yahn ye ne, va che çahcovan ye, din ye cud̄ado vederihquentiyon min. ³⁰Ndete che den̄an çah Dendiohs ndudo che cuahndudo t̄ama ye ne, ihyan che a quendihco mend̄ahn rahndudo ye ne, nguan ye cuahndudo ye, cuahnecun ye che cuahndudo combiero yahn ye. ³¹Hua redin yahn che d̄amandahn cuahndudo nchuhn, te co cuahtenan rino vih ne, cuahndudo ca āma ca āma ne çava che co conahn nducoȳaca ihyan ndiȳaco, ne cuahtenan ino ye. ³²Co cuahtenan rino vih ne, te andahre vederihquentiyon che chenan cuma ne redin che rahndudo ne, ate co çahcantiyon man̄ ne, ne cuahndudo ne ura che redin yahn. ³³Tihç̄a, te Dendiohs ne, runec̄ade ye, ne runec̄ade nducuahn vederihquentiyon yahn ye.

Nduhç̄a che va çade nduh cuan̄ yaco n̄an che rendo d̄ama ihyan yahn Dendiohs ne, ³⁴hua redin yahn che cuahndudo ihyan nd̄ahta. Tahque ndah ye ne, nevahnecon ye nduhç̄a che rihquentiyon ley che dirun Moisés. ³⁵Ndete che va deh che tumerune ye ne, ndev̄aco ye tumerune ye inch̄ahn ye, te hua redin yahn che tumerune ye chete yaco.

³⁶Cuedevano nchuhn, te Ndudo yahn Dendiohs ne, ndiyu nduco nchuhn can̄an, nde ndiyu deman̄ çava nchuhn che va. ³⁷Adecochano nchuhn che rahco ne che quenan cuma ne vederihquentiyon che rahndudo ne ndudo che rete Dendiohs, o t̄ama n̄an vederihquentiyon yahn Vaco Ndah yahn ye ne, ndete che cūaco ne, conahn ne che a Dihvo vo Jesucristo chihquentiyon ye che tihç̄a dirún. ³⁸Ate adecoduhno ihyan che hua nevahnecon ye ne, hua nevahnecon nchuhn ihyan.

³⁹Dihnó, man̄ ne, codin nun ino nchuhn che cuahtenan cuma ne vederihquentiyon che cuahndudo ne ndudo che rete

Dendiohs. Namin hua çahca t̄an ne yahn vederihquentiyon che chenán cuma dihno vo che rahndudo ye t̄ama te o ñan dev̄aco. ⁴⁰Nahn che runec̄ade ne ñan nducuahn che redin ne. Ca āma ca āma ne cuahndudo ne.

Dihvo vo Jesucristo ne, ntuche ye v̄an ten̄ahn

15 ¹Dihnó, namin nahn che ndedecadino nchuhn yahn ndudo ndah yahn Dihvo vo Jesucristo che cahndudó, chihnevan ne. Nevahnecun ne ndudo min, ne nde meniyon riquendi ne ritahno ne ihyan. ²Ndete che numa cūaco chitahno ne nduhc̄a che cahndudó m̄an, quendi ne dinahn ne m̄an ne, din ndudo min che ndevahn ne. ³Dendiohs ne, te ye checadinó vederihquentiyon yahn ye che tahque men̄an vihca, ne cahndudó, chihnevan nchuhn. Vederihquentiyon min ne, che chih Dihvo vo Jesucristo çava nunde yuhn vo nduhc̄a che a ndirun ñan Ndudo yahn Dendiohs. ⁴Chihno ino ro che cheche ye ne, ntuche ye nduhc̄a che a ndirun ñan Ndudo yahn Dendiohs. ⁵Cuahn che a ntuche ye ne, chihnde ro ye ñan Pedro. Chihno min ne, chihnde ro ye ñan nduh che ndichiama apóstol yahn ye. ⁶Adiva ne, nchuh ca uhn ciento dihno vo che ndi d̄ama ye ne, ndihchero ye ihyan. N̄ahn ihyan chahn ne, a chih ye, ne ñahn ye ne, vate ca ye nde meniyon. ⁷Tah cuahn adiva ne, ndihchero Jacobo ihyan. Chihno min ne, ndihchero nducoȳaca ihyan apóstol ihyan.

⁸Nde ñan che chihnonan yahn ne, chihnde ro ye ñan. U che nde hua redin yahn che din yahn ye u ne, namin ndihchero ihyan. ⁹V̄an nducoȳaca ihyan apóstol ne, u che tahque hua rigonun chihvé. Nde hua redin yahn che có apóstol, te din t̄an nduco ihyan yahn Dendiohs che ritahno ye Dihvo vo Jesucristo. ¹⁰Ate din yahino Dendiohs u, ne ndedevahn ye u, te ye vederihquentiyon quenán cumá. Āma chichihve che din yahino ye u, te u che tahque d̄in ntiyon yahn ye che co nducoȳaca ihyan apóstol chen̄ahn. Ate ndiyu nduco vededevano yahn m̄an che din ntiyon yahn ye, te numacuahn vedeyahino chinan m̄an ye u. ¹¹Nducote a ntuche Dihvo vo Jesucristo v̄an ten̄ahn ne, u m̄an, ihyan apóstol chen̄ahn m̄an, a ndudo min che rahndudo nducoȳaca nuhn. Me nchuhn ne, a chihnevan ne ndudo min, chitahno ne.

Ten̄ahn ne, va che ntuche ye

¹²Nducote a ntuche Dihvo vo Jesucristo, chacotuhn nuhn ndudo yahn ne, hua nd̄ahc̄a redin āma o ihyan v̄an nchuhn

che vatechica ye rahndudo ye che tenahn ne, hua ntuche ye. ¹³Ndere rahñ ye chemin, te Dihvo vo Jesucristo ne, cuāco niyon che ntuche ye. ¹⁴Andahre tihcā rahñ ihyan chahn, ate richihve ndudo che rahndudo nuhn, namin cochihve yahn nchuhn che chitahno ne, te Dihvo vo Jesucristo ne, a ntuche ye. ¹⁵Numa cuāco rahndudo nuhn Ndudo yahn Dendiohs che ndedetuhche ye Dihvo vo Jesucristo. Me ihyan chahn che rahñ ye che hua ntuche tenahn ne, nahn conahn che nde Dihvo vo Jesucristo ne, hua ntuche ye. ¹⁶Ate Dihvo vo Jesucristo ne, cuāco niyon che ntuche ye. Namin quenán cuma che ntuche tenahn. ¹⁷Che rahñ ihyan chahn che metah vederihquentiyon che ntuche tenahn ne, nahn conahn che hua ntuche Dihvo vo Jesucristo māñ, hua chichihve yahn ne che chitahno ne ihyan māñ, nde hua ndāca ne vederenchahco cava nunde yahn ne māñ. ¹⁸Che lado yahn ihyan chahn ne, tenahn che chitahno ye Dihvo vo Jesucristo ne, ama yune no chihnonan yahn ye. ¹⁹Vañ nducoyāca ihyan ne, uvo che tahque ndah ro yuhn vo, te ritahno vo Dihvo vo Jesucristo, ne quenán cuma che ntuche vo.

²⁰Menāñ vihca ne, ndedetuhche Dendiohs Dihvo vo Jesucristo. Namin quenán cuma che ndedetuhche ye nducoyāca tenahn che chitahno ye ihyan, ²¹te nduhcā che cava ama ihyan chihnde vederih ne, tihcā cava tama ihyan ne, chihnde cāde che ntuche tenahn. ²²Tihcā, te che chih Adán ne, quenán cuma che coh nducoyāca ihyan. Namin che ntuche Dihvo vo Jesucristo ne, quenán cuma che ntuche nducoyāca ihyan yahn ye. ²³Ihyan ne, a va cāde ro che ntuche ye. Menāñ vihca ntuche Dihvo vo Jesucristo, ne cuahn che ndaconan chi tun ye ne, tuhme ntuche nducoyāca ihyan yahn ye. ²⁴Chihno min ne, va che nto iyehñse, decuihno Dihvo vo Jesucristo nducuahn vederihquentiyon che rahcotāñ yahn ye, ne ndahco ye vederihquentiyon yahn ye tah Dendiohs Chida. ²⁵Tihcā, te Dihvo vo Jesucristo ne, va che quendi ye cahcantiyon ye nde conan ndahco ndiya Dendiohs nducoyāca ihyan che hua ri rendihche ye ihyan cava che nevahñecun ihyan chahn ihyan. ²⁶Nde nāñ che cuihnonan yahn ne, decuihno Dihvo vo Jesucristo vederih. ²⁷Tihcā va che co, te a ndirun nāñ Ndudo yahn Dendiohs che ndahco Dendiohs nducuahn vederihquentiyon tah ye. Che tihcā ndirun che

ndahco Dendiohs vederihquentiyon tah Dihvo vo Jesucristo ne, nahn conahn che man ye ndinan ye, hua chuhnan Dihvo vo ihyan. ²⁸Dihvo vo Jesucristo, ihyan min che Daya Dendiohs ne, nuhnde tah ye nducuahn vederihquentiyon, ne nevahnecon ye Chida ye Dendiohs. Cahco ro man ye che ihyan min che ndahco ye vederihquentiyon tah ye man, ihyan min che ndinan ye man. ²⁹Me ihyan che redenune ye cava tenahn yahn ye ne, ja ndiyu che chenani ino ye che ntuche ihyan chahn che tihca redin ye? Ndete che hua quenani cuma che ntuche tenahn ne, co nde hua tihca din ye.

³⁰Ndete che hua va che ntuche tenahn ne, nde hua redin yahn che cahco mendahn nuhn nuhn, din tan ihyan nduco nuhn. ³¹Dihno, nduhca che cuaco che ama yeno che chitahno nchuhn Dihvo vo Jesucristo ne, tihca ndudo cuaco che ndihco mendahn u, redin tan ihyan nduco. ³²Muhn yan Efeso ne, anduhneca ndete che van ite tan quenani. Ndete che hua cuaco che va che ntuche tenahn ne, nde hua cahquinoh cahco mendahn u tihca. Tahque ndah ne, cochica vedeyeno yahn man, chah man, cuh man, te caviyan deman ne, va che coh. ³³Hua cahnech man ne nchuhn, ndedecadino ne che hua dehva co yahn ne che dama co ne nduco ihyan nunde, te co nino ne, ne quendi ne yune yahn ye. ³⁴Condedecadino nchuhn, ne runecade cuahtenan ne, hua cuahtendihco ne nunde. Redin yahn che tihca yahve nchuhn, te nde van nchuhn ne, vate ca ihyan che hua renahn ye vederihquentiyon yahn Dendiohs, ne chemin ne, ama vedecuihno cava ne.

Nduhca che va che nutuche tenahn

³⁵Co vate ama o nchuhn che tumerune ne, taca ntuche tenahn? Taca ndo numa ye ne? ³⁶Ama tundo ihyan che tihca tumerune ye. A devano ye te cuahn che rihcho vo ama ndute ndata ne, riquendah yan, ne rihta, ate man ndute ndata ne, rechca. ³⁷Che rihcho vo trigo, o tama nan ndute ndata ne, cuahn che riquendah ne, ametah dama nduco ndute ndata che chihcho vo. ³⁸Redin Dendiohs che rihta tunoca ndata yahn nduhca che a ndihco cade ye. ³⁹Nducuahn che dendah Dendiohs ne, hua dama nduco vih. Vate ihyan man, vate ite che cun cah te man, vate yahda man, vate yahca man, ne queri ama ne, a vih vih chan. ⁴⁰Namin che chenani nan ro

nduco che va ndiyahn ne, hua dāma nduco vih. Ndahchan nduh che o nan, ate queri ama ne, a vih vih chan. ⁴¹Dave yahn yahn man, dave yahn iyo man, dave yahn iyon man ne, hua dāma. Nde iyon ne, hua dāma dave yahn nduco vih. ⁴²Atihnoçā vederihquentiyon che ntuche tenahn, te cuahn che ntuche ye ne, a ntacorun ye, ametah dāma ye nduhchan ye cuahn che chahtenan ye ihyense. Che rehche ihyan ne, ndih ye, ate che ntuche ye ne, ametah ndaconan coh ye. ⁴³Che rehche ye ne, ndih ye, ate che ntuche ye ne, ama ndahchan ye. Che rehche ye ne, ndih ye, ate che ntuche ye ne, detino ye. ⁴⁴Che rehche ye ne, ihyan iyehense ye, ate che ntuche ye ne, ndacorun ye, co ye ihyan yahn vahchetero, cuahtenan cuma ye vederihquentiyon yahn Vaco Ndah yahn Dendiohs. Vate ihyan iyehense; namin vate ihyan yahn vahchetero.

⁴⁵Tihçā, nduhçā che a ndirun nan Ndudo yahn Dendiohs tuhçā: “Van ihyan iyehense ne, menan vihca dendah Dendiohs Adán.” Adiva yahn ihyan min ne, ndā tāma ihyan ndinan che a nahn dāma nduhçā ihyan min, chica ye vahchetero, chihco ye vederihquentiyon che va che ntuche ihyan yahn ye. ⁴⁶Man ro cuh ne, ihyan iyehense uvo, ate caviyan deman ne, ndaçondā vo ihyan yahn vahchetero. ⁴⁷Adán me ne, ihyan iyehense ye, dendah Dendiohs ihyan nduco yuniyahñ. Adiva yahn ihyan min ne, ndā Dihvo vo Jesucristo, ihyan min che chica ye vahchetero. ⁴⁸⁻⁴⁹Nduhçā che dāma vo nduco ihyan che dendah Dendiohs nduco yuniyahñ me ne, tihçā dāma co vo nduco ihyan che chica ye vahchetero me.

⁵⁰Dihno, rahn rí nchuhn te numanahn che metah ndacorun ihyan iyehense ne, hua co cuahtenan ye vahchetero nan che rihquentiyon Dendiohs. Hua co ye min nduhchan ye man ro cuh. Ihyan che va che coh ye ne, hua co cuahtenan ye min nan che ametah ndaconan coh ihyan. ⁵¹Namin nte cuandé nchuhn ama ndudo che cade te Dendiohs checadino vo. Hua nducoyāco vo va che coh vo, ate nducoyāco vo ne, va che ndacorun vo ⁵²venchahteno nduhçā che riya cuah. Tihçā va che co ro min cuahn che cuah corneta nan cuihnonan yahn. Ura che cuah corneta me ne, ntuche tenahn, metah ndaconan coh ye, ne ihyan che vate ca ye ro min ne, ndacorun ye. ⁵³Va che ndacorun ye, te ihyan ne, hua rengu ye, ne quenana cuma che ndaçondā ye ihyan che ngu ye cuahn dāma. Namin ihyan

ne, rih ye, ne quenán cuma che ndacondá ye ihyan che metah ndaconan coh ye. ⁵⁴Cuahn che a ndo vo ihyan che rengu ye, che metah ndaconan coh ye ne, tuhme conahn nduhcá che a ndirun nan Ndudo yahn Dendiohs tuhca: “Vederih ne, cuihno. Ametah ndaconan coh ihyan.” ⁵⁵Vederihquentiyon min ne, cuihno. Ametah deh cuande che vah vo. Ametah dehva co yuhn vo. ⁵⁶Che numacuahn vedeyah rih ihyan ne, chihnde cava nunde yahn ye. A ley yahn Dendiohs che dito yahn vederihquentiyon min. ⁵⁷Nundihve cuahn Dendiohs che dechuh ye Dihvo vo Jesucristo, ndedevahn ye uvo tah vederih. ⁵⁸Dihno che yahnó nchuhn ne, nducote va che ntuche vo ne, chemin che cuiquendi ne numa ino ne codin ne ntiyon yahn Dihvo vo Jesucristo. A devano ne te ntiyon che redin ne yahn ye ne, cochihve.

***Vedino che chi dama cava ihyan yahn
Dendiohs che vate ye yan Jerusalén***

16 ¹Me yahn vedino che co dama cava ihyan yahn Dendiohs ne, codin dama nchuhn anduhca che chihquentiyon nduh cuan yaco, yahn yahn Galacia. ²Ndate ndate domingo ne, cuihco vih queri ama nchuhn tume nduhva che tuno tah ne, cava che hua nde ro che nda, nedin dama ne vedino min. ³Cuahn che nda ne, ihyan che tendahnun nchuhn ne, dechuh ihyan yan Jerusalén. Dirun caca, quenda ye nduco vedino yahn ne, necah ye dihno vo che vate ye min. ⁴Ndete che va che cah man ne, cah nuhn dama nduco vih.

Nte cade Pablo ti nduh nan che va che cah ye

⁵Dinoca cah quendihcheró dihno vo che vate ye yahn yahn Macedonia, tuhme chí quendihcheró nchuhn. ⁶Ndete che co ne, conán nduco nchuhn ama o iyo, o ndete che co ne, conán numacuahn ro iche. Tuhme co conan nchuhn u adecotino che va che cah. ⁷Tihca, te hua nahn che atenan ama o ro no conán nduco nchuhn. Ndete che te yune Dendiohs ne, nahn che rah conán nduco ne. ⁸Ate conan cá muhn yan Efeso nde nda vihco yahn Pentecostés, ⁹te ama va ntiyon yahn Dihvo vo Jesucristo che redin man, ama yahn ihyan che rahcotahn ye man.

¹⁰Cuahn che nda Timoteo ne, cuenevahnecon nchuhn sahn cava che conan se numacuahn vedeyeno, te sahn min ne,

redin se ntiyon yahn Dihvo vo Jesucristo nduhcá u. ¹¹Hua ducherino ne, ndihchero ne sahn. Tahque ndah ne, conan ne sahn cava che va man ino se ndaca che chuhnun se che conun yune se, te quenán rinó sahn nduco dihno vo chenhahn.

¹²Me dihno vo Apolos ne, ama chica favor sahn che chi se nduco dihno vo chenhahn, quendihchero se nchuhn, ate hua cahnecon se. Atenan cuahn che conun yahn se, chi se.

Renecah Pablo Dendiohs dihno vo che vate ye yan Corinto

¹³Cuiquendi nchuhn numa ino ne cotahno ne Dihvo vo Jesucristo man, cuahteyan ne man, cuan dito ne man.

¹⁴Nducuahn che din ne ne, codin ne numacuahn vedeyahino.

¹⁵Dihnó, a devano nchuhn te van ihyan che vate ye yahn yahn Acaya ne, Estéfanos nduco ihyan ndevaco ye menan ndita chitahno ye ndudo ndah yahn Dihvo vo Jesucristo.

Namin a devano ne te redinah ihyan chahn vederihquentiyon che rinan ye ihyan yahn Dendiohs. ¹⁶Cuiquendi nchuhn

yune yahn ihyan chahn, codinahn ne nduhca che redinahn nducoyaca ihyan che redin ye ntiyon yahn Dihvo vo Jesucristo man, rinan ye ihyan yahn ye man. ¹⁷Ama yenó che nda

Estéfanos man, Fortunato man, Acaico man, te anduhneca ndete che nchuhn nda ne. ¹⁸Necah yan ye chedave yahn man, nchuhn man. Nahn che ntumanecun ne nducoyaca ihyan che

nduhca ihyan chahn. ¹⁹Numacuahn vedeyahino yahn Dihvo vo Jesucristo cuendeva nchuhn Dendiohs yahn nducoyaca

dihno vo che vate ye yahn yahn Asia, Aquila man, Priscila man, nduco nducoyaca dihno vo che rendo dama ye vaco ye.

²⁰Cuendeva ne Dendiohs yahn nducoyaca dihno vo che vate ye muhn. Numacuahn vedino vedenecon cuenechah ne Dendiohs vih.

²¹U Pablo, dirun man ama o ndudo yahn ne, renté Dendiohs nchuhn.

²²Cochi Dihvo vo Jesucristo. Adecoduhno ihyan che hua din yahino ye ihyan min ne, conda ye, co ye castigo yahn Dendiohs.

²³Ihyan min ne, din yahino ye nchuhn. ²⁴Me u ne, ama yahinó nducoyaca nchuhn che ritahno ne ihyan. Tihca co.